

రోమియుల్క రెగిడ్లి ఉత్త్రమ్. బారిక్ జలో పవులు రోమ్ పట్టుమ్చ సంగుమ్చక రెగిడ్లి ఉత్త్రమ్

మొదొల్ కోడు

¹ రోమ్ పట్టుమ్తెచ దేముడు ప్రేమ కెర్ల జోచి సుద్ది జా జోచయ్ జంక మెన, జో నిసాన బుకార్ల మాన్సుల్క, యేసుక్రీస్తుక *గొత్తి సుదొ జలో పవులు రెగిడ్లి ఉత్త్రమ్. దేముడు దిలి సుబుమ్ కబుర్ నూనయ్తి రిసా ఆవ్ జోచొ బారికి జంక మెన, యేసుక్రీస్తు అంక నిసాన బుకారా అస్సె. ఈంజయి కామ్ అంక సొర్పు దా అస్సె. ² ఈంజ సుబుమ్ కబుర్ తెద్రవుక మెన అగ్గెయి తెంతో జోచ కబుర్లు సంగిలనచి అత్తి, జో రెగ్గయ్లి జో దిలి దేముడుచి కొణొతె ప్రమానుమ్ సంగ తిలన్. ³ సుబుమ్ కబుర్ మెలె, జో దేముడుచొ ఎక్కి పుత్తున్చి రిసొచి కబుర్. జో పుత్తున్క 'మాన్సు' మెన దెకిలె, అమ్ యూదుల్చొ దావీదు పూర్గుమ్చొచి సెకుమ్తె జెర్మిలన్. ⁴ అమ్చొ ప్రబు జలో యేసుక్రీస్తు, జో మొర గెచ్చ అన్నె జివ్ జా ఉట్టిన్ రిసొ దేముడుచి పూత్తు మెన దేముడుచి సుద్ది తిలి ఆత్తుచి ఒగ్గర్ సెక్తి తెన్ రుజు కెరన్లన్. ⁵ జలె, ఎత్తి దేసిమి జోక నంపజా జోచి కోడు నిదాసుమ్ కెర జోచి నావ్ గవురుమ్ కెర్తు మెన మాన్సుల్క సుబుమ్ కబుర్ నూనయ్త జోచ బారికుల్ అమ్ జంక మెన, జో ప్రబు జోచి దయ అమ్క దా అస్సె. ⁶ యేసుక్రీస్తుచ సొంత మాన్సుల్ తూమ్ కి జంక మెన, జేవ్ తెన్ బెదుక మెన వేర వేర దేసిమ్లుతె తుమ్క కి దేముడు బుకారా అస్సె. ⁷ అమ్క అబ్బొ జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

* 1:1 1:1 నెంజెలి 'గొత్తి జలో రితి', నెంజెలి 'సేవ కెర్లొసా'.

రోమియుల్క దెకుక మెన పవులుచి ఆన

8 తొలితొ కిచ్చొ మెలె, తుమ్ ఎత్తిజిన్చి రిసా †యేసుక్రీస్తుచి నావ్ దెర అంచొ దేముడుక అంచి సర్ల ఆవ్ సంగితసి. ప్రబుచి ఉప్పిరి తుమ్ రోమియుల్ తుమ్చి నముకుమ్ త్తిలిన్చి రిసా ఒండి లోకుమ్చ మాన్పుల్ నూన అస్తి. 9 జోచొ పుత్తున్చి రిసాచి సుబుమ్ కబుర్ నూనవ నూనవ ఆవ్ సేవ కెర్తొ దేముడు అంచి రిసా సాచి జతయ్. ఆవ్ ప్రార్దన కెర్తి పొది, కెయడ తెయడ నే పిట్టె తుమ్చి రిసా జోక ఆవ్ సంగితసి. 10 తుమ్చి రిసా ఆవ్ ప్రార్దన కెర్తినతె ఏక కిచ్చొ మెలె, జోచి దయ తిలె, కీసి గే తుమ్తె ఆవ్ అప్పె జెంక వాట్ దెవున్ మెనయ్ ఆవ్ ప్రార్దన కెర్తసి. 11 తుమ్చి ఆత్మక డిట్టుమ్ కెర్తి రితి తుమ్క కిచ్చొ జవున్ ఆత్మసెక్తి దొర్కు కెర్తి రితి కిచ్చొ జవున్ కామ్క జెతిసి కెరుక మెన, తుమ్క దెకుక తుమ్తె గెచ్చుక అంక ఒగ్గర్ ఆన. 12 తుమ్చి ఆత్మక డిట్టుమ్ కెరుక మెన సంగిలె, తూమ్ కి ఆవ్ కి, ఎక్కిలోక ఎక్కిలో నముకుమ్ దెకిలె అన్నె సర్ల దయిరిమ్ జమ్దె.

13 ఓ బావుడ్లు, తుమ్ కిచ్చొ జానుక అంచి ఇస్టుమ్ మెలె, యూదుల్ నెంజిల అన్నె ఒగ్గర్ జిన్తె ఆవ్ కీసి గెచ్చ ప్రబు దిలి పంటొ జోవయింతె లాయ అస్సి గే, తుమ్తె గెచ్చ, తుమ్తె కి దస్సి పంటొ లాయిక మెన ఆవ్ ఒగ్గర్ సుట్టు ఉచర అస్సి, గని అప్పెక అంక వాటు అడ్డు తా అస్సె. 14 †గ్రీసు దేసిమ్చక కి, గ్రీసు దేసిమ్చ నెంజిలనక కి, ఒగ్గర్ సదు కెర్లనక కి, సదు నేన్ల మాన్పుల్క కి ఆవ్ సుబుమ్ కబుర్ నూనవుక మెన, ప్రబు అంక పూచి తియార అస్సె. 15 జాకయ్, తుమ్ రోమ్ పట్టుమ్చక కి సుబుమ్ కబుర్ బోదన కెరుక మెన అంక ఒగ్గర్ ఇస్టుమ్ అస్సె.

† 1:8 1:8 మెలె, యేసుక్రీస్తు జోవయింక నంపజలనచి పాపుమ్ వయ గెచ్చయ్లి రిసా 'జోయ్యి మదెనె జతికయ్ ఎత్తి అదికారుమ్ తిలో దేముడు అబ్బొసి అమ్చ ప్రార్దనల్ నూనెదె' మెనయ్, జయి దయిరిమ్క యేసుక్రీస్తుచి నావ్ దెర పవులు దేముడుక ప్రార్దన కెర్తయ్, ఆవ్ కి జోవయింక ప్రార్దన కెరుక జతయ్. † 1:14 1:14 గ్రీసు దేసిమ్చ మాన్పుల్క మెనుక జతయ్, గని పవులు ఈంజ ఉత్తమ్ రెగిడ్ల పొదులె, యూదుల్ నెంజిల ఎత్తిజిన్క కి 'గ్రీసు దేసిమ్చక' మెనుక ఏక్ అలవాట్ తిలి.

నముకుమ్ వాట్కయ్ రచ్చన దొర్కు జతయ్

16 సుబుమ్ కబుర్చి రిసా అంక కిచ్చొ లాజ్ నాయ్. సుబుమ్ కబుర్చి ఉప్పిరి అంక పూర్తి దయిరిమ్. కీనంపజతో ఎత్తి మాన్సు పాపుమ్ తెంతో రచ్చించువ కెర్తి రిసా దేముడుచి సెక్తి సుబుమ్ కబుర్ తెయి అస్సె. జా రచ్చన క్రీస్తుక నంపజతన ఎత్తిజినక, *తోలితో యూదుల్క, పడ్డో యూదుల్ నెంజిలనక. 17 దేముడుచి పున్నిమ్ సుబుమ్ కబుర్ తెయి డీస్తయ్, దొర్కు జతయ్†. జో దెతి జా పున్నిమ్, జా రచ్చన, అమ్క కీసి దొర్కు జతయ్ మెలె, ‡పూర్తి నముకుమ్ వాటు. దేముడుచి కొడెతె జో సొంత రెగ్గయ్లి రితి, “ప్రబుచి ఉప్పిర్చి నముకుమ్క కో పున్నిమ్కీ జవుల గే జెవ్వి జవుల”.

దేముడుచి పున్నిమ్ నెసిలనచి రిసాచి తీర్పు

18 దేముడుక విరోదుమ్ జా మాన్సుల్క పాపుమ్ కెర కెర జోవయించి పెట్టిచి పాపుమ్తె సత్తిమ్క లుంకడ్డో, దస్సి ఎత్తి మాన్సుచి ఉప్పిర్ జోచి కోపుమ్ జో దేముడు పరలోకుమ్ తెంతో సువ దా దెకయెదె, లయడెదె మెన రుజ్జు *డిన అస్సె. 19 దేముడుక జేవ్ విరోదుమ్ జలిసిచి అన్నె మాన్సుల్క జేవ్ కెర్ల పాపల్క ‘జోవయించి పాపుమ్’ మెన కీసి సంగుక జయెదె మెలె, జో దేముడుచి రిసా జేవ్ జానుక జతిసి ఎత్తి జోవయించి పెట్టి జాన్తి. కీసి మెలె, జొయ్యి సొంత జోవయింక దెకవ అస్సె. 20 కీసి మెలె, జో నే డీస్తాసా కీసా

§ 1:16 1:16 మెలె, క్రీస్తుకయ్ నంపజతో ఎత్తి మాన్సు. యోహాను 1:12, 3:16, 18, 36.

* 1:16 1:16 తోలితో యూదుల్క అవ్కాసుమ్ తంక చి పడ్డోకయ్ యూదుల్ నెంజిలనక అవ్కాసుమ్ తంక మెన ఎత్తి అదికారుమ్ తిలో దేముడుచి సెలవ్. లూకా 24:47, బారికుల్ 1:8, 13:46. † 1:17 1:17 జోచి సత్తిమ్ పున్నిమ్ జోవయింక నంపజలనక దొర్కు కెరన్తికయ్ అమ్క అన్నె బెదవంతయ్. ‡ 1:17 1:17 నెంజిల ‘చి జా సత్తిమ్ పున్నిమ్

అమ్క దొర్కు జలె, అన్నె నముకుమ్ పలోయ్తయ్’. § 1:17 1:17 నెంజిలె “ప్రబు దెతి పున్నిమ్ జలన జోవయించి ఉప్పిర్చి నముకుమ్కయ్ ఇండుక” హబక్కూకు 2:4 దెక.

* 1:18 1:18 సిలువతె యేసు మాన్సుచి పాపుమ్ వయ గెచ్చయ్లిన్తె నయ్తానుక మొర్కుక జిన పాడ్ కెర అస్సె; ఎబ్రియల్ 2:14. నయ్తానుక జిన పాడ్ కెర్లిన్ తెన్ నయ్తాను చి సేవ కెర్లిసి ఎత్తిచి ఉప్పిరి కి యేసు జిన పాడ్ కెర అస్సె.

అస్సె గే, మెలె జోవయింక 'కెయఱ తెయఱ తాఱ గెతి సెక్తి అదికారుమ్ జోకయ్ అస్సె. జొయ్యి దేముడు' మెలి రుజ్జు లోకుమ్ జెర్మయ్లి తెంతో, జో తెయార్ కెర్లిన్ ఎత్కితె సొస్తుమ్ డీస్తయ్, చి తెదొడి తెంతో మాన్సుల్ పూర్తి చిన అస్తి. జాకయ్, ప్రబుచి మొక్కె "నేనుమ్" మెనుక నెతిరి. ²¹ దస్సి, జోవయింక 'జొయ్యి దేముడు' మెన జేవ్ జాన్లె కి ఒప్పన్తి నాయ్, జోక గవురుమ్ దెకితి నాయ్, జో దిలిన్క 'తుయి దిలది' మెన ఒప్పన్తి నాయ్, జోక సర్ల సంగితి నాయ్, గని వెర్రి బుద్ది జల, చి బుద్ది నెంజిల జోవయించ పెట్టి అందర్ జా గెల. ²² 'జాన్ల మాన్సుల్ ఆమ్' మెననయి జేవ్ బుద్ది నెంజిలన జా గెల. ²³ అస్సె, నే మొర్తో కెయఱ తెయఱ జీవ్ తతో దేముడుక ముల దా, మాములుమ్ మొర్త మాన్సుల్చి రూపుమ్చ, పిట్టల్ రూపుమ్చ, జంతువుల్ రూపుమ్చ, అయివో రూపుమ్చ బొమ్మల్క ఇస్టుమ్ జా, దసచకయ్ జొకరుక దెర్ల.

²⁴ జాకయ్ దేముడు జోవయింక కిచ్చొ సిచ్చ దిలన్ మెలె, "జోవయించి పెట్టిచ ఆసల్ రితి ఇండ లంజె కమొతె పూర్తి గెచ్చ, ఎక్కిలోక ఎక్కిలో జోవయించ ఆగ్గక నిస్కారుమ్ కెరన, జోవయింక జెవ్వి మరియాద కడన్తి సిచ్చ సేడ్తు, కతు" మెనయ్, దస్సితెయ్ జో జోవయింక సొర్ప కెర దిలన్. ²⁵ దేముడుచి రిసొచి సత్తిమ్ గ్యానుమ్ జేవ్ నెన కెర అబద్దుమ్క ఇస్టుమ్ జల, చి జో ఎత్కి జెర్మయ్లోసిచి సేవ కెరుక ముల కెర, జో తెయార్ కెర్లిన్కయ్ జొకరుక దెర, దసచచి సేవ కెర్తతి. గని జెర్మయ్లోసొకయ్ కెయఱ కి జెయ్యి! ఆమేన్.

²⁶ జలె, 'జెర్మయ్లోసొక ముల కెర తయార్ జలిన్కయ్ జేవ్ కోర్ప జలి రిసొయి, జోవయించి ఆగ్గచి పాపుమ్చ ఆసల్క దెర్పు సేడయ్ తత్తు' మెన, దసితె జో దేముడు సొర్ప కెర దిలన్. దస్సి, మాములుమ్ తెర్పిమున్ను జతిన్ ముల దా, జోవయించ తేర్బోదల్ తెన్ లంజె జంక దెర్ల. ²⁷ జోవయించ మున్నుబోదల్ కి దస్సి, తెర్ని తెన్ చెంగిల్ జితిసి ముల దా, ఎక్కిలోక ఎక్కిలో పూర్తి వెర్రి ఆన జా, ఎక్కిలో తెన్ ఎక్కిలో లంజె వెట్కారుమ్ జా, జోవయించ ఆగ్గతె ఆత్మల్తె జోవయించి జా

పాపుమ్ కెలచి, పాడ్ జల.

28 అన్నె, దేముడుక 'అన్నె. జొయ్యి దేముడు' మెన జేవ్ బప్పునుక నెన కెర జోక పచ్చిల్ రిసా, కామ్క నెంజిలి బుద్దితె, పొరపాట్ ఇండితినె జోవయింక జో సార్ప కెర దిలన్. 29 జోవయించి పెట్టి కిచ్చొ బెర్లి మెలె, ఎత్కి రగల్ పాపుమ్బుద్ది, పాపుమ్ కమొ, అన్నె మాన్సుల్చి ఆస్తిక ఆస జతిసి. కుస్సిదుమ్ కి బెర్లి. జోవయించి పెట్టి బెర్లు గోసల్, అత్యల్ కెర్తి బుద్ది, కొణొ జుజవ జట్టి జతిసి, మోసిమ్ కెర్తిసి, కుస్సిదుమ్ ఉచర్తిసి, దస బుద్దుల్ జల. జేవ్ అన్నె కీసచక జల మెలె, సాండెల్ జలస, 30 మాన్సుల్క ఆరిచ నిందల్ సంగ, జోవయించి నావ్ పాడ్ కెర్తస, పరలోకుమ్చొ దేముడుక విరోదుమ్ కెర్తస, అన్నె మాన్సుల్క నిస్కారుమ్ కెర్తస, గవురుమ్ ఉచరంతస, 'అన్నె కిచ్చొ కిచ్చొ గర్ప కమొ కెరుమ' మెన ఉచర్త కుట్రల్ కెర్తస, అయ్యోన్అబ్బొన్చి కోడు నే సూన్తస జల. 31 జేవ్ బుద్ది నెంజిలస, జేవ్ బప్పన్లి కామ్ నే కెర్తస, ప్రేమ నేన్లస, కన్కారుమ్ నేన్లస. 32 "దస కమొ కెర్తస, మొర్తి సిచ్చక విలువ జతతి" మెన దేముడు తీర్పు కెర అన్నె మెన జేవ్ జాన్లె కి, దస కమొ ఇండితతి. చి దస కమొ అన్నె మాన్సుల్ ఇండిలె, మెన్సితతి, 'చెంగిల్' మెంతతి.

2

దేముడుచి పున్నిమ్చి తీర్పు

1 జాకయ్, ఓ మాన్సు కొన్సొ జలెకి, తుమ్ ఎక్కిలోక ఎక్కిలో 'గర్ప' మెన తీర్పు సంగిలె, తుమ్చ సొంత పాపల్చి రిసా తుమ్క కి జా తీర్పు లయితయ్. మెలె, అన్నెక్కోక 'గర్పొ' మెన తీర్పు సంగిలె, తుమ్క తుమి పాపుమ్ వయడ్తసు. తూమ్ తీర్పు సంగిలో మాన్సు కొన్సొ జలెకి, జో కెర్త తప్పుల్తె తూమ్ కి ఇండితసు. 2 ఆవ్ అగ్గె రెగిణ్ణి జాబిత తప్పు కమొ కో కెరుల గే, దేముడు జోవయింక తీర్పు కెర, సిచ్చ కెరుక ఒప్పున అన్నె మెన జానుమ్. అన్నె, జో సత్తిమ్చొ జతయ్చి రిసా జో కెర్తి తీర్పు సరిగచి మెన జానుమ్. 3 ఓ మాన్సు కొ జలెకి, దస

కమొ కెర్తనక జోవయించి పాపుమ్చి తీర్పు తుమ్ సంగిలె, తూమ్ కి దస కమొ కెర్లె, దేముడు దెతి సిచ్చ తుమ్కయ్ పిట్టెదె మెన ఏక్ వేల ఉచరంతసు గే? 4 నెంజిలె, 'ఆమ్ కిచ్చొ కెర్లె కి జోచి ఎదివాట్ దయ అమ్చి ఉప్పిరి అస్సె, చి ఓర్పువ జా అమ్క చెమించుప కెరెదె' మెన తుమ్క తూమ్ ఉచరంతసు గే? తుమ్క 'జోవయించ పాపల్ ఒప్పన ముల్తు' మెనయ్ జో దేముడు జోచి దయ దెకయ్తయ్ మెన నేన్ను గే?

5 తుమ్చి రాడ్ జివుక తుమ్చ పాపల్ ములుక నెస కెర, జో దేముడు దెతి సిచ్చ తుమ్క తుమి ఆనన్తసు. జా సిచ్చ కెయ్క లయెదె మెలె, ఎత్తిజిన్క తీర్పు కెర సిచ్చ గే, బవుమానుమ్ గే దెతి జోచి సత్తిమ్క రుజ్జు దెకయ్తి వెల్లి దీసికయ్. 6 జోవయించి జివితుమ్క కేన్ మాన్సు కీస కమొ కెర్లె తవుల గే, జయ్యి దీసిక దసచక సరిజతిసి తీర్పుల్ జో జర్గు కెరెదె. 7 జా దీసి నే జతె అగ్గెచి మదెనె సగుమ్జిన్ పరలోకుమ్చి ఉజిడతె బెదితి, ప్రబు గవురుమ్ జతిన్తె బెదితి ఆస జా, జో దెతి సత్తిమ్క నిదానుమ్ ఇండుల. "జేవ్ పరలోకుమ్తె అంచి తెన్ కెయ్క తెయ్క జితి జివ్, జో దెయెదె. 8 గని సగుమ్జిన్ జోవయించి ఇన్సుమ్ అయ్లి రితి ఇండుక ఆస జా, సత్తిమ్ ఇండితిసి ముల కెర, పాపుమ్ ఇండితతి. జోవయించి ఉప్పిరి, జో దేముడుచి కోపుమ్ తయెదె, చి జో దెతి సిచ్చ కచితుమ్ జోవయింక లయెదె. 9 దేముడు జా సిచ్చ జర్గు కెర్లె, ముక్కిమ్క తొలితో యూదుల్తె, పడ్డొ *గ్రీసు దేసిమ్చతె కి, పాపుమ్ ఇండితో ఎత్తి మాన్సుక బాదల్ దుకుమ్ పిట్టె నాయ్, 10 తొలితో యూదుల్తె, పడ్డొ గ్రీసు దేసిమ్చ మాన్సుల్తె కి, సత్తిమ్ ఇండితో ఎత్తి మాన్సుక 'బవుమానుమ్' మెన దేముడు జోవయింక జోచి పరలోకుమ్చి ఉజిడతె బెదవ గవురుమ్ దా, సేంతుమ్ దెయెదె."

11 దేముడు తేడల్ దెకె నాయ్. 12 అమ్ యూదుల్క జో దిల అగ్గుల్ నేన్తె యూదుల్ నెంజిలనతె కో పాపుమ్ కెర తవుల గే, జేవ్ అగ్గుల్ నెంతె తీర్పు జా నాసెనుమ్తె గెచ్చుల, అన్నె, అమ్ యూదుల్

* 2:9 2:9 'గ్రీసు దేసిమ్చ' మెన ఇన్నె సంగిలె, యూదుల్ నెంజిలనక సంగితయ్.

జేవ్ ఆగ్నల్ జానుమ్. జేవ్ ఆగ్నల్ జాన్ల అమ్ యూదుల్తె కో పాపుమ్ కెర తవుల గే, ఆగ్నల్చి తెడి అస్తిచి జేవ్ ఆగ్నల్ జోవయించి ఉప్పిరి సాచి జవుల, చి జోవయించి పాపుమ్చి సిచ్చ జేవ్ వయుల. 13 మోసేచి అత్తి దేముడు దిల ఆగ్నల్ ఎక్కి సూన్తనయ్ నాయ్, గని జేవ్ ఆగ్నల్తె బెదితి బుద్ది ఇండితనయి కో జలె, జోవయింకయ్ దేముడు జోవయించి పాపుమ్ నే వయడ్తె జోవయించి దయకయ్ 'జోవయింక దొర్కు జలి పున్నిమ్ అస్సె' మెన దెకెదె. దెక జోవయించి సిచ్చ పిట్టయెదె.

14 పడ్డో, యూదుల్ నెంజిలన, మోసే తెన్ దేముడు దిలి ఆగ్నల్ నెంతె తిలె కి, ఒత్తచ ఆగ్నల్ జేవ్ నేన తిలె కి, నేన జాన్ల రిత జా జేవ్ ఆగ్నల్ తెన్ బెదితి బుద్ది జేవ్ ఇండిలె, జేవ్ ఆగ్నల్ జేవ్ కెయ నే సూన్లె కి సదు నే కెరై కి, జేవ్ ఆగ్నల్ జోవయించి పెట్టి కామ్ కెర్తి రితి జతయ్. 15 దొర్కు జలి ఇండడి దెకయ్త ఆగ్నల్ దేముడు కిసి మోసే తెన్ దిలి ఆగ్నల్తె రెగ్గవ అస్సె గే, 'దస్సి ఇండుతు' మెన జేవ్ మాన్సుల్చి పెట్టి జో రెగ్గ అస్సె మెన రుజ్జు జతయ్, అన్నె, 'సత్తిమ్' మెన జేవ్ సత్తిమ్ చినితిన్తె, 'పాపుమ్' మెన జేవ్ పాపుమ్ చినితిన్తె కి రుజ్జు జతయ్. అన్నె, జోవయింక జెవ్వి పరిచ్చ కెరన నిందల్ వయడన్లె రితి, నెంజిలె చెమించుప కెరన్లె రితి, జోవయించ సొంత కమొ 'చెంగిల్' గే 'గార్' గే జెవ్వి చినన ఒప్పునుల. 16 అమ్ సూనయ్లి సుబుమ్ కబుర్తె కిచ్చొ ఏక్ బెదితయ్ మెలె, జేవ్ ఇసి తీర్పు కెరంతిసి కెయక పూర్తి జర్గు జయెదె మెలె, క్రిస్తు జలో యేసుచి అత్తి దేముడు మాన్సుల్చి పెట్టిచ గుట్టుల్ తిలిసి ఎత్తి తీర్పు కెర్తి జా వెల్లి దీసికయ్, తెదొడకయ్ పూర్తి రుజ్జు జయెదె.

యూదుల్క మోసే తెన్ దేముడు దిలి ఆగ్నల్

17 గని ఒత్తచ తుమ్ యూదుల్, 'యూదుల్ ఆము' మెనన, 'ఆగ్నల్ రితి దేముడు అమ్కయ్ దా అస్సెచి రచ్చన జమ్దె' మెన ఆగ్నల్కయ్ నంప కెర్తసు జలె, 'అమ్ యూదులి దేముడు తెన్ బెద అస్సుమ్' మెన గవురుమ్ ఉచరంతసు జలె, 18 మోసే తెన్ దేముడు

దిలి ఆగ్నుల్తె తిలిసి ఎత్తి వెల్లెల మాన్సుల్ తుమ్క సికడ అస్తివి రిసా, దేముడుచి ఇస్టుమ్ కిచ్చొ కిచ్చొ జతయ్ గే తుమ్ జాన్సు. జలె, చెంగిల్ తిలిన్తె గార్ తిలిసి నిన చెంగిల్చి మెన్సితను జలె, ¹⁹ పడ్డొ 'గుడ్డి జలసక వాట్ దెకయ్తస ఆము' మెన, 'అందర్బుద్దితె తిలసక ఉజిడి దెకయ్తస ఆము' మెన, ²⁰ 'బుద్ది నెంజిలసక సికడ్తస ఆము' మెన, 'బాలబోదల్క సికడ్తొసా జలమ్ ఆము' మెన, 'గ్యానుమ్ ఎత్తి సత్తిమ్ ఎత్తి మోసే తెన్ దేముడు దిలి ఆగ్నుల్తె అమ్తెయి, అమ్చ ఆగ్నుల్తెయి అస్సెచి దేముడు జా పూచి ఎత్తి అమ్కయ్ తియార అస్సె' మెన తుమ్ నిజుమి ఉచర్లె, ²¹ వేర మాన్సుల్క తుమ్ సికడ్తస తుమ్కయ్ తూమ్ కిచ్చొక సికడన్సు నాయ్! 'చోరుక నాయ్' మెన తుమ్ బోదన కెర్లె కి, చోర్పు నాయ్ గే? ²² 'లంజెకమొ కెర నాయ్' మెన సంగిలే కి లంజెకమొ కెర్తను గే? 'బొమ్మల్క జొకరుక నాయ్, వెట్కారుమ్!' మెన ఒప్పన్లె కి, గుడివొతెచ బొమ్మల్ తుమ్ చోర దెర గెతను గే? తుమ్ ఉచర. ²³ 'దేముడు మోసిచి అత్తి అమ్ యూదుల్కయ్ జోచ ఆగ్నుల్ దా అస్సె' మెన తుమ్ గవురుమ్ ఉచరన్లెకి, ఆగ్నుల్క నిదానుమ్ నే కెర్లె దేముడుచి మరియాద కడ ఇండితను గే? ²⁴ తుమ్ అమ్చ యూదుల్ కి దస పాపల్ కెర్తను. దేముడుచి కొడొతె పూర్గమ్ తెంతొ రెగిడ్డి రితి, † "తుమ్ యూదుల్చ కమొచి రిసా, యూదుల్ నెంజిల మాన్సుల్ దేముడుచి నావ్ దూసుప కెర్తతి".

²⁵ దేముడు దిల ఆగ్నుల్ రితి పూర్తి తప్పు నెంతె ఇండిలెకయ్ తుమ్ యూదుల్ జోచయ్ మాన్సుల్ జతి గుర్తుచి సున్నతిక విలువ తయెదె. గని జో దిల ఆగ్నుల్ ఇండితిసి తుమ్ పిట్టవన్లె, జోచయ్ మాన్సుల్ జతి గుర్తు దెకయ్తి జా సున్నతి తుమ్ కెరన తిలె కి, నే కెరన్లి రితి జయెదె. ²⁶ జలె, జోచి అగి జా సున్నతి నే కెరన్లో మాన్సు కో జలెకు దేముడుచ ఆగ్నుల్ తెన్ బెదితి బుద్ది ఇండ ఆగ్నుల్తె సంగిలి దొర్కు జలి సత్తిమ్ నెరవెర్పుప కెర్లె రితి జలె, జో జా సున్నతి నే కెరన్లెకి,

† 2:24 2:24 యెసయా పుస్తకుమ్ 52:5, యెహెజ్కేలు 36:22.

ఆత్మకయ్ జో జా సున్నతి కెరన్లి రితి జా అస్సె మెన జో దేముడు దెకె నాయ్ గే? దెకెదె. ²⁷ దస్సి జలె, యూదుల్ నెంజిల మాస్సుల్ జోవయించి అగి జా సున్నతి నే కెరన్లెకి, జోవయింతె సగుమ్జిన్ దేముడుచ ఆగ్గుల్ తెన్ బెదితి బుద్ది ఇండితతి. అస్సె, తుమ్ యూదుల్క మోసే తెన్ జోచ ఆగ్గుల్ దా తిలె కి, తుమ్చితె సగుమ్జిన్ ఆగ్గుల్చి కోడు నే కెరై పిట్టయ్తను. జలె, లోకుమ్చ ఎత్కిజిన్క ప్రబు పరిచ్చు కెర్తి వెల్లి దీసి అయ్లె, ఈంజ మదెనె ప్రబుచి బుద్ది ఇండిల జేవ్ యూదుల్ నెంజిలస తుమ్క నేరిమ్ వయడ్త సాచుల్ జవుల. మెలె, జోవయింక తుమ్క ప్రబు తీర్పు కెర్తె, తుమి తీర్పు సేడ పాపుమ్ వయితె. ²⁸ మెలె, యూదుడు జెర్మ ఎక్కి అగి కెరన్లి గుర్తు తిలోసాక 'నిజుమ్చో యూదుడు' మెనుక నెంజె. పడ్డో ముక్కిమ్క కలుసువ జలి సున్నతి అగి కెరంతిసి నెంజె. ²⁹ దస్సి జలె "కో నిజుమ్చ యూదుల్ జవుల?" మెన పుసిలె, ఆత్మకయ్ సుద్ది జలో ఎత్కి మాస్సు. సత్తిమ్ దెతి సున్నతి కిచ్చో మెలె, రెగ్డయ్లి ఆగ్గుల్చి రిసా అగి కెరంతిసి నెంజె, గని మాస్సుచి పెట్టి దేముడుచి సుద్ది తిలి ఆత్మ జర్గు కెర్తిసి. జోవయించి ఆత్మతె కో సుద్ది జా జోచయ్ మాస్సుల్ జా తవుల గే, జెవ్వి నిజుమ్చ యూదుల్ జవుల. జోచయ్ జల మాస్సుల్క కిచ్చో ముక్కిమ్ మెలె, మాస్సుల్ దెతి గవురుమ్ నాయ్, గని దేముడు దెతి గవురుమ్.

3

దేముడుచి సత్తిమ్ గెచ్చె నాయ్

¹ జలె, వేర మాస్సుల్క చి కంట అమ్ యూదుల్క కిచ్చో జిన్లి వరుమ్ అస్సె గే? నెంజిలె, అమ్ యూదుల్ జలి చినన్తి సున్నతి కెరంతిన్తె కిచ్చో లాబుమ్, కిచ్చో విలువ అస్సె గే? ² అమ్ యూదుల్క లాబుమి, దేముడు తొలి సంగిల ప్రమానల్ దేముడుచ కొడో అమ్ యూదుల్చి అత్తి జో సార్పు కెర దా అస్సె, జాక అమ్ చెంగిల్ దెకుక మెన, ఒత్త తిలిన్క అమ్ సాచి సూనవుక మెన.

3 దస్సి జలె, అమ్ యూదుల్తె సగుమ్జిన్ నముకుమ్ నెంజిలె కిచ్చొ జయెదె? జేవ్ నముకుమ్ నెంజిలిన్చి రిసా జోవయించొ అమ్చొ దేముడుక 'నిదానుమ్చొ నెంజె' మెనుక జయెదె గే? 4 ఎత్కి మాన్సు అబద్దుమ్ జలెకి, దేముడు సత్తిమ్ తయెదె. దేముడుచి కొణెతె పూర్గుమ్ జోవయించి రిసా జొయ్యి రెగ్డయ్లి రితి;

*“తుచ కొణె నెరవెర్చుప జతిన్తె తుచి సత్తిమ్ రుజ్జు జయెదె, చి మాన్సుల్ తుక పరిచ్చ కెరై తుయి జిన్తె”.

5 గని అమ్ యూదుల్చి పాపుమ్చి రిసా అమ్ వెట్కారుమ్ నిస్కారుమ్ జా అస్సుమ్. జో దేముడుచి సత్తిమ్, మాత్తుమ్, జోక గవురుమ్ ఆన్తయ్. జలె, అమ్చి పాపుమ్క దెకిలె, జోచి సత్తిమ్క దెకిలె, జా తేడ డిస్టిన్తె జోకయ్ గవురుమ్ జెతయ్ జలె, అమ్ కిచ్చొ ఉచరుక? 'అమ్ పాపుమ్ కెర్తిన్ చి జో సత్తిమ్ కెర్తిన్చి తేడ దెకిలె జోచి గవురుమ్ డిస్టయ్చి రిసా అమ్చి పాపుమ్తె జోకయ్ లాబుమ్' మెన, జవున్, 'అమ్చి పాపుమ్చి రిసా జో అమ్క సిచ్చ కెరుక బెదె నాయ్' మెన అమ్ ఉచరుక గే? మాన్సుల్చి పాపుమ్ బుద్దికయ్ మాన్సు ఇని ఉచరుక జయెదె. 6 దస్సి ఉచరుక నాయ్. 'ఒండి లోకుమ్చ మాన్సుల్క ఆకర్క పరిచ్చ కెర తీర్పు కెర సిచ్చల్ దెయిందె, బవుమానల్ దెయిందె' మెన జో ఒవున అస్సి. జలె, అమ్ యూదుల్చి పాపుమ్క 'కిచ్చొ నెంజె' మెలి రితి జో దెకితో జలె, ఒండి లోకుమ్చ మాన్సుల్క కో కిసి సత్తిమ్చి తీర్పు కెరుక జయెదె! బెదె నాయ్.

7 'దస్సి మెను నాయ్' మెంతె. 'అంచి అబద్దుమ్చి రిసా దేముడుచి సత్తిమ్ సొస్టుమ్ డీస జోచి గవురుమ్ దెకయ్తయ్ జలె, అంచి పాపుమ్చి సిచ్చ ఆవ్ కిచ్చొక వయుక?' మెంతె, ఓ మాన్సు. 8 'చెంగిల్చి జర్గు జవున్ మెనయ్ పాపుమ్ కెరుమ్' మెంతె సగుమ్జిన్. అమ్క “జేవ్ కి దస్సి సంగితతి” మెన, అమ్చి మరియాద కడన్తి రితి సగుమ్ జిని అమ్క నింద సంగితతి మెన

* 3:4 3:4 కీర్తనలు 51:4

తుమ్ జాన్సు. జలె, జేవ్ దస్సి సంగితస జోవయించి జా పాపుమ్చి సిచ్చు కి కతి రితి దేముడు లయడెదె. జోచి తీర్పు సరిగా అస్సె.

లోకుమ్ ఎత్తిచ మాన్సుల్ పాపుమ్ కెర్లస

9 జలె, కిచ్చొ ఉచరుక జయెదె? వేర మాన్సుల్చి కంట అమ్ యూదుల్క దేముడుచి సిచ్చు పిట్టయ్తిసి కిచ్చొ జలెకు తయెదె గే? నాయ్, గెద! ఆవ్ జేవ్చి కంట గొప్పు సుదల్ గే, నెంజుమ్ గెద, ఆవ్ ఉప్పిరి రుజ్జు రెగ్గ దెకయ్లి రితి, ఎత్తి మాన్సు. యూదుల్ జలెకి, గ్రీసు దేసిమ్చ జలెకి, కో జలెకి, పాపుమ్క దెర్ను సేడ పాపుమ్ సుదల్ జా అన్సుమ్ 10 దేముడుచి కొడతె పూర్లుమ్ రెగ్గవ తిలి రితి,
+“సత్తిమ్చొ మాన్సు కేనె కి నాయ్. ఎక్కిలో కి నాయ్.

11 కోయి బుద్ది తతోసా నాయ్,

జీవ్ తిలో దేముడుక చ్చజితోసా కోయి నాయ్.

12 ఎత్తి మాన్సు సత్తిమ్ ముల, కామ్క నెంజితిన్తె సేడ గెచ్చు అస్తి. కోయి సత్తిమ్ కెర్తి నాయ్, ఎక్కిలో కి నాయ్.”

13 †“జోవయించి డెంగొ ఉగిడ్ల మెస్సున్, జోవయించ కొడె గని.

మోసిమ్ కెర్తి రిసాయి జీబు చోడి బులయ్ తతి.

అయివొచి విస్సుమ్ జోవయించ ఒట్టోతెయి అస్సె.”

14 †“జోవయించి చోడి బెర్తు సాపెనల్ మూర్కుమ్ విస్సుమ్ అస్సె.

15 * జోవయించ చట్టో లోయి దెకుక మెన బే బేగి నిగుల.

16 నాసెనుమ్ కస్టుమ్ జోవయించి ఇండితి వట్టె అస్సె.

17 సేంతుమ్ వాట్ ఇండుక ఎద్దరె నేన్తి.

18 † దేముడుక ఎదిలి కి బితి నాయ్.”

19 మోసి తెన్ దేముడు దిలి ఆగ్గుల్తె కిచ్చొ కోడు తిలె కి, కక్క సంగితయ్ మెలె, జా ఆగ్గుల్చి రితి తెడిచ మాన్సుల్కయ్. కిచ్చొక మెలె, జోవయింతె కోయి దేముడుక జబాబ్ దెంక నెతిర్తి రితి ఎత్తి.

† 3:10 3:10 10-12 కీర్తనలు 14:2, 3 చి 53:3. † 3:13 3:13 కీర్తనలు 5:10, చి 139:4. † 3:14 3:14 కీర్తనలు 10:7. * 3:15 3:15 15-17: యెసయా 59:7-8. † 3:18 3:18 కీర్తనలు 36:2.

చోడి ముద్దో జంక, చి యూదుల్ కి నే పిట్టె, ఒండి లోకుమ్చ ఎత్తి మాన్సు దేముడుచి సిచ్చక జలిలెక జవుల, దేముడుచి పరిచ్చ జోవయించి తీర్పు జంక. 20 మెలె, దేముడు మోసే తెన్ దిలి ఆగ్నల్చి రితి ఇండితి వాటు దేముడుచి మొక్కె ఈంజ లోకుమ్చో కేన్ మాన్సుచి పాపుమ్ పుంచె నాయ్, చి ఆగ్నల్ రితి మాన్సుల్క తీర్పు కెర్లె, జో కక్కయ్ 'పున్నిమ్చో' మెనుక బెదె నాయ్. ఆగ్నల్ అమ్చి పాపుమ్ పుంచితి నాయ్. అమ్చి పాపుమ్ దెకయ్తతి. జేవ్ ఆగ్నల్తె తిలిన్చి రిసా అమ్చి పాపుమ్ చినితసుమ్.

యేసుక్రీస్తుక సంపజలె పున్నిమ్

21 ఆగ్నల్తె నాయ్. గని వేరతెయ్ దేముడు జోవయించి పున్నిమ్ మాన్సుల్క దొర్కు కెర అస్సె. జాకయ్ †మోసే పూర్గుమ్చొచి అత్తి దేముడు రెద్దయ్ల ఆగ్నల్, అన్నె పూర్గుల్చి అత్తి సంగిల దేముడుచ కబుర్లు కి అగ్గె తెంతో జా రుజ్జు డీస్తయ్. జలె, జా పున్నిమ్ ఆగ్నల్ రితి నాయ్, గని వేరతెయ్ దొర్కు జలిసి అప్పెయి మాన్సుల్క జానయ్ జా అస్సె. 22 జా పున్నిమ్ యేసుక్రీస్తుచి ఉప్పిరి కో జోచి నముకుమ్ తివుల గే, జేవ్ ఎత్తిజిన్కయ్ 'పున్నిమ్' మెలి రితి దేముడు దెకెదె, జేవ్ కొన్న జలెకి జోచి పున్నిమ్తె జోవయింక వాట దెయెదె.

మాన్సుల్తె జో తేడల్ దెకె నాయ్. 23 మెలె, కో కి పాపుమ్ కెర దేముడు దెకయ్లి సత్తిమ్ ఇండుక నెత్త కెర, జోచి మొక్కె ఓడుప జా అస్తి. 24 జాకయ్, జో కిచ్చొ వాటు మాన్సుల్చి పాపుమ్ పుంచ అస్సె మెలె, జోచి దయకయ్ ఆరి అమ్క నీతిసుదల్ కెర అస్సె. కిసి మెలె, క్రీస్తు జలొ యేసు అమ్చి పాపుమ్ వయిలిన్క జో దేముడు అమ్క నయ్తాన్చి రాజిమ్ తెంతో నెతోవ గెల అస్సె. 25 అమ్ కెర్ల పాపల్క అమ్ జెతికయ్ సిచ్చ పిట్టయ్తి బలి జో జంక జోచి లొయి సూచుక

† 3:21 3:21 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెద్దయ్లి ఆగ్నల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పుస్తకుమ్తె రెద్దయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగిడ్లి దేముడుచ ఆగ్నల్ మెన రెద్దవ అస్సె.

మెన దేముడు అబ్బొసి జోవయింక టీవడన్. జా రచ్చన వరుమ్ అమ్ మాన్సుల్క కి, క్రీస్తుచి ఉప్పిరి అమ్ అమ్చి నముకుమ్ తింక. జో అబ్బొసి జా బలి దిలిసి ఏక్ రుజ్జు దెకయ్తయ్. పాపుమ్క 'పాపుమ్. జా పాపుమ్ గెలెకయ్ మాన్సుల్క అంచి తెన్ అన్నె బెదవనుక జయెదె' మెన జో సత్తిమ్చి తీర్పు కెర్లెన్చి రుజ్జు దెకయ్తయ్. కిచ్చొక మెలె, జోచి పరలోకుమ్చి కన్కారుమ్ బుద్దిక అమ్చ అగ్గెచ పాపల్ సిచ్చ కెరుక వాయిద కెర తిలన్. 26 జో సత్తిమ్చ తీర్పుల్ కెర్లొసా జలిన్చి జా రుజ్జు ఈంజయి కాలుమ్క దెకవుక మెనయ్ వాయిద కెర్లెన్. అన్నె కిచ్చొక మెలె, 'కో యేసుకయ్ నంపజవుల గే, జోవయించి పాపుమ్ పుంచి జయెదె, జోవయింకయి పున్నిమ్ దెకిన్దె' మెనయ్ రుజ్జు దెకయ్తి రిసాయి వాయిద కెర్లెన్.

27 జాకయ్, 'అమ్ యూదుల్కయ్ దేముడు మోసే తెన్ దిలి ఆగ్గుల్తె పున్నిమ్' మెన అమ్ కిసి గవురుమ్ ఆననుక జయెదె! నెంజె. కిచ్చొచి రిసా, దేముడు మోసే తెన్ దిలి ఆగ్గుల్చి రితి అమ్ మాన్సుల్ కెర్లకము కామ్క నెంజిలిన్చి రిసా నాయ్, కామ్క అయ్లి రిసా నాయ్, గని నముకుమ్ వాటు అమ్క రచ్చన దొర్కు జతయ్. 28 నిజుమ్చి, కిచ్చొ ఒప్పన్తసుమ్ మెలె, కేన్ ఆగ్గుల్ రితి ఇండితిన్తె పున్నిమ్ నాయ్, జా నేన్లిన్చి రిసాయి కో నాసెనుమ్తె గెతి నాయ్, గని, ప్రబుచి ఉప్పిరి నముకుమ్ తిలెకయ్ మాన్సుచి పాపుమ్ పుంచి జయెదె, చి దేముడు జో మాన్సుక పున్నిమ్ మెలి రితి దెకెదె మెన ఒప్పన్తసుమ్. జా రచ్చన రితి నముకుమ్ వాటు దొర్కు జతిసి.

29 నెంజెలె, దేముడు ఎక్కి యూదుల్కయ్ దేముడు జయెదె మెంతె గే? యూదుల్ నెంజిలసక కి జో దేముడు జయె నాయ్ గే? నిజుమ్చి, యూదుల్ నెంజిలసక కి జొయ్యి దేముడు. 30 కిచ్చొక మెలె, ఎత్తిక జో దేముడు, జో ఎక్కిలో. ఎక్కిలోతె ఏక్ రగుమ్ అన్నెక్లొతె అన్నెక్ రగుమ్ జతొసా నెంజెచి రిసా వేర వేర రచ్చన కెరె నాయ్, గని యూదుల్ జతి గుర్తుచి సున్నతి కెరల్లసక క్రీస్తుక నంపజా గెలె, జేవ్ నంపజలి రిసాయి జోవయించి పాపుమ్ జో పుంచెదె చి జోవయింక 'పున్నిమ్'

మెలి రితి దెకెదె. అన్నె, జా సున్నతి నే కెరన్లన జోవయింక నంపజా గెలె, జోవయించి నముకుమ్చి రిసాయి జోవయించి పాపుమ్ కి, జో పుంచ జోక కి 'పున్నిమ్' మెలి రితి దెకెదె.

31 దస్సి జలె, ఎక్కి జోచి ఉప్పిర్చి అమ్చి నముకుమ్చి రిసాయి అమ్క 'పున్నిమ్ జల' మెలి రితి జో దెకెదె మెలె, జో దిల ఆగ్గుల్ అమ్ వెంట గెలుక గే? నెంజె. అమ్చి నముకుమ్చి రిసాయి జో దిల ఆగ్గుల్ తెన్ బెదితి సత్తిమ్ అమ్ ఇండుకయ్. దస్సి, జేవ్ ఆగ్గుల్తె తిలిసి నెరవెర్చుప కెరుమ్దే.

4

నముకుమ్ వాట్, దేముడుచి దయ వాటు రచ్చన

1 జలె, అమ్ యూదుల్చో పూర్గుమ్చో అబ్రాహామ్చి రిసా కిచ్చో మెనుమ? ఆగ్ రగుమ్చి అమ్చి జెర్మున్చి రిసా ఉచర్లె, అమ్ యూదుల్చి సెకుమ్క జో అబ్బో జయెదె. 2 జలె, ఏక్ వేల జోచ కమెచి రిసాయి అబ్రాహామ్క పున్నిమ్ కలుగు జతి జలె, జో అబ్రాహామ్ గవురుమ్ ఉచరనుక జతి, గని జోవయించ కమెచి రిసాయి జోవయింక పున్నిమ్ మెన మాన్సుల్ ఉచర్లె కి, దేముడు దస్సి దెకె నాయ్.

3 * "అబ్రాహామ్ దేముడు సంగిలి కోడు నంప కెర్లి రిసాయి 'జోక పున్నిమ్' మెలి రితి జో ప్రబు దెకిలో"

మెన దేముడుచ కొడెతె రెగ్గ అస్సె. 4 జలె, కో జలెకు కామ్ కెర్లె 'కామ్ కెర్లె' మెన దెతి కూలి దానుమ్ నెంజె, జా, చి అబ్రాహామ్ "నంప కెర్లి రిసాయి 'జోక పున్నిమ్' మెలి రితి ప్రబు దెకిలో" మెన దేముడుచి కోడు తెన్ రెగ్గవ అస్సె. 5 దస్సి, అబ్రాహామ్ తెన్ కిసి జర్గు జలి గే, అన్నె మాన్సుల్ తెన్ కి దస్సి జయెదె. మెలె, కిచ్చో కామ్క జెతికయ్ కామ్ జేవ్ నే కెర్లె కి, కిచ్చో కామ్ కి కామ్క నెంజిలె కి, పాపుమ్ కెర్లెక జోచి దయకయ్, జోవయించి పాపుమ్ పుంచితో దేముడుకయ్ కో నంప కెర్లె,

* 4:3 4:3 అదికాండుమ్ 15:6.

జోవయించి నముకుమ్చి రిసాయి 'అంచి పున్నిమ్ జోవయింక దా అస్సి' మెలి రితి జో పాపుమ్ పుంచితో దేముడు దెకెదె.

6 దస్సి, "జోవయించ కమొచి రిసా నాయ్, గని జోచి దయచి రిసా దేముడు కక్క కక్క 'జోవయింక పున్నిమ్' మెలి రితి దెకెదె గే, జోవయింకయ్ చెంగిలి" మెన దావీదు పూర్గమ్చొ ఏక్ కోడు రెడ్డ అస్సి.

7 † "కిచ్చొ తప్పుల్ చెమించుప జా అస్తి గే,

కచ పాపల్ పుంచి జా అస్తి గే,

జోవయింకయ్ చెంగిలి

8 కేన్ మాస్సుచి పాపుమ్ ప్రబు జోవయింక వయడె నాయ్ గే,

జోకయ్ చెంగిలి"

మెన రెగ్గ అస్సి.

9 జలె, ఈంజ చెంగిల్ వరుమ్ కక్క దొర్కు జతయ్? ఎక్కి యూదుల్ జతి గుర్తుచి సున్నతి కెరన్లసకయ్ దొర్కు జతయ్ గే జా సున్నతి నే కెరన్లసక కి దొర్కు జతయ్ గే? అబ్రాహామ్ నంపజలిస్కయ్ 'జోక పున్నిమ్' మెలి రితి ప్రబు జోచి దయక దెకిలన్ మెంతసుమ్. 10 జలె, ప్రబు జోక 'జోవయింక పున్నిమ్' మెలి రితి దెకిలిసి కెయ తెంతో? జా సున్నతి జో నే కెరంతె అగ్గె తెంతో గేర్ కెరన్ల పడ్డో గే? పడ్డో తెంతో నాయ్. అగ్గెయ్ తెంతో. 11 జా సున్నతి నే కెరంతె అగ్గె తెంతో జో నంపజలిస్చి రుజ్జు దెకయ్తి గుర్తుకయ్ పడ్డో జో జా సున్నతి కెరన్లొ. దస్సి, జా సున్నతి నే కెరంతె కో నంపజా ప్రబు ఆరి దెతి పున్నిమ్ జా తవుల గే, జోవయింకయ్ అబ్రాహామ్ అబ్బొసి జయెదె. దస్సికయ్, జా సున్నతి నే కెరంతె అగ్గె కి ప్రబు 'జోవయింక పున్నిమ్' మెలి రితి అబ్రాహామ్క దెకిలొ. 12 అన్నె, దస్సి కి, కో జా సున్నతి కెరన తిలె కి, జా సున్నతి నే కెరంతె అగ్గె తెంతో దేముడుచి కోడు నంప కెర్లొ అబ్రాహామ్చి రితి జవుల గే, మెలె, జోచి రితి నంపజవుల గే, జోవయింకయ్ కి అబ్రాహామ్ అబ్బొసి జయెదె.

13 దస్సి, "ఈంజ లోకుమ్ ఏలుప కెర్తి వాట తుమ్క దొర్కు కెరిందె" మెన అబ్రాహామ్క చి 'జోచి సెకుమ్తె పడ్డో జెర్కుక తిలనక' మెలి కోడు,

† 4:7 4:7 కీర్తనలు 32:1-2.

దేముడు సంగిలి ప్రమానుమ్ కేన్ వాట్ అయ్లి మెలె, ఆగ్గుల్ రితి వాట్ నాయ్, గని జో దేముడుచి కోడు జో నంపయ్ కెర్తనచి రిసా 'జోవయింక పున్నిమ్' మెలి రితి జో దెకిలన్. 14 ఏక్ వేల దేముడు మోసే తెన్ దిలి ఆగ్గుల్ రితి కెర్తన, జేవ్ జా ఆగ్గుల్ రితి కెర్లి రిసాయి అబ్రాహామ్చ పుత్తర్లు జా ఏలుప కెరుక తత్తి జలె, దేముడు సంగిలి ప్రమానుమ్ కామ్క నెంజిలి, జా ప్రమానుమ్చి ఉప్పిర్చి నముకుమ్ కామ్క నెంజిలి.

15 అమ్ ఆగ్గుల్ తిలనచి ఉప్పిర్చి తీర్పు కిచ్చొ మెలె, 'పున్నిమ్ జా అస్తి' మెన కచి రిసా ఆగ్గుల్ సాచి జతి నాయ్. ఆగ్గుల్ తిలె, అమ్చ కమొక 'పాపుమ్చయ్' మెన రుజ్జు దెకవయ్ అమ్చి పాపుమ్చి రిసాచి సిచ్చ అన్తతి. అన్నెక్ కిచ్చొ మెలె, ఆగ్గుల్ నెంజిలిన్తె, ఆగ్గుల్ నేన్లనతె కో పాపుమ్ కెర అస్తి గే, నెంజిలె ఏక్ వేల పున్నిమ్ కెరుక జతి జలె 'పున్నిమ్ కెర అస్తి' గే ఆగ్గుల్ వాట్ రుజ్జు కెరుక నెంజె. 16 జేవ్ దొన్ని అల్లర్చి రిసా మాన్సుచి రచ్చునక దేముడు కిచ్చొ దిలో మెలె, జొయ్యి ఆదారుమ్ కెర్లిసి కిచ్చొ మెలె, కమొ నెంజె, గని రితి నముకుమ్ తెన్. కిచ్చొక మెలె, కమొ నాయ్, గని నముకుమ్ ఆదారుమ్ జలె, జా ప్రమానుమ్ జెయిమ్ జతిన్క దేముడుచి దయయ్ సాలు, అన్నె, జా ప్రమానుమ్ జోచి దయచి రిసా జెయిమ్ జయెదె జలె, అబ్రాహామ్చ పుత్తర్లు జలన ఎత్తిజిన్కయ్ జా ప్రమానుమ్ జెయిమ్ జయెదె. అబ్రాహామ్చ పుత్తర్లు యూదులి, అమ్చి దేముడు మోసే తెన్ దిలి ఆగ్గుల్ అమ్చ తిలనయ్ గని అన్నెకోయి నాయ్ మెన నాయ్, పడ్డొ 'అమ్ యూదుల్ ఎత్తిజిని' మెన నాయ్. గని అబ్రాహామ్చి రితి దేముడుచి †కోడు నంప కెర్తన ఎత్తిజిని, జేవ్ యూదుల్ జలెకి

† 4:16 4:16 'అబ్రాహామ్క ఎత్తి అదికారుమ్ తిలో దేముడు సంగిలి కోడు' మెలె, జోవయించి సెకుమ్తె పడ్డొ జెర్మితన పడ్డొక ఏలుప కెర్తనచి రిసాచి కోడు. జేవ్ పడ్డొ ఏలుప కెర్తనక యేసుక్రీస్తు ముక్కిమ్చొ జయెదె, చి జోవయింతెన్ ఏలుప కెరుల. పడ్డొ జో ఎత్తి అదికారుమ్ తిలో దేముడుచి కొణ్ణొ ఎత్తి నంప కెరుక ముక్కిమ్, గని ముక్కిమ్క 'జోవయించి కోడు' మెలె, యేసుయి; యోహాను 1:1-2, 14; చి యేసుచి రిసాచి సుబుమ్ కబుర్, జోవయించి రిసా దేముడు మోసే తెన్ దిలి ఆగ్గుల్ సంగిలిసి ఎత్తి.

నెంజిలె కి జోచ పుత్తర్లు జవుల. జోచి రితి నముకుమ్ తిల ఎత్కిజిన్క జో అబ్రాహామ్ అబ్బొ జయెదె. ¹⁷ దేముడుచ కొడతె రెగ్లయ్లి రితి,
 §“ఒగ్గర్ దేసిమ్లుచ సెకుమ్లుచ మాన్సుల్క తూయి అబ్బొసి జతి
 రితి ఆవ్ సంగ అస్సి.”

మెన అబ్రాహామ్క జో సంగిలన్. దస్సి, మొర్లసక జియడ్తో, అగ్గె నెంజిలిసిక తిలిసి రిత బుకార్తో దేముడుక అబ్రాహామ్ నంప కెర్లొ, దేముడుచి మొక్కె అమ్ జో దేముడుచి కోడు నంప కెర్తస ఎత్కిజిన్క అబ్రాహామ్ అబ్బొ జా అస్సె. ¹⁸ ఒగ్గర్ దేసిమ్లుచ సెకుమ్లుచక జో అబ్బొ జతిసి జెయిమ్ జతిసి జో అబ్రాహామ్క రుజ్జు నే డీసిలెకి, జో జా ఆస తెన్ తిలన్, అస్సె,

*“అగాసుమ్చ సుక్కల్ కీసి ఎత్తివాట్ అస్తి గే,

దస్సి తుమ్చి సెకుమ్తె వడ్తో జెర్మితస ఎత్తివాట్జిన్ జవుల”

మెన జో దేముడు ప్రమానుమ్ సంగిలిసి జో నంప కెర్లన్. ¹⁹ ఆఁగుక జో మంత్రొ జా పుంజెక్ వెర్పుల్ జా తా మొర్తి వయసు జా తిలె కి, తేర్పి జలి సారా గొడ్డు జా తిలె కి, జో అన్మానుమ్ జయె నాయ్. ²⁰ కేన్ సుట్టు జా ప్రమానుమ్చి ఉప్పిరి అన్మానుమ్ జయె నాయ్, గని దేముడుక ‘జా జెయిమ్ కెరెదె’ మెన నముకుమ్ తా జోక గవురుమ్ దెతె తిలన్, చి జోచి నముకుమ్ అన్నె డిట్టుమ్ జలి. ²¹ ‘జో సంగిలి రితి దేముడు కెరుక తెరె’ మెన పూర్తి నముకుమ్ తెన్ తిలొ. ²² జాకయ్, ‘జోచి నముకుమ్, జోక పున్నిమ్ జలి రితి జతయ్’ మెన దేముడు తీర్పు కెర్లొ. ²³ గని ‘జోచి నముకుమ్, జోక పున్నిమ్ జలి రితి జతయ్’ మెలి కోడు ఎక్కి జోచి రిసా నాయ్, ²⁴ గని అమ్చి రిసా కి. అమ్చొ ప్రబు జలొ యేసుక అన్నె జియడ్తో దేముడు అబ్బొన్చి ప్రమానుమ్ అమ్ నంప కెర్లె, అన్నె మాన్సుల్క కి ‘జోచి నముకుమ్ జోక పున్నిమ్ మెలి రితి జతయ్’ మెంతి తీర్పు జోచి దయక కెరెదె. ²⁵ అమ్చయ్ పాపల్ వయితి రిసా ప్రబు జలొ యేసు అమ్క జెతి సిచ్చ సేడ్లన్. జా సిచ్చ

§ 4:17 4:17 ఆదికాండుమ్ 17:5. * 4:18 4:18 ఆదికాండుమ్ 15:5.

అమ్మక లయితిసి పిట్టవుక మెన. అన్నె, అమ్మచి పాపుమ్ దస్సి †వుంచి జలిసి రుజ్జు జవున్ మెనయ్ దేముడు అబ్బొసి జోక అన్నె జియడ్లన్.

5

యేసుక్రీస్తుచి అత్తి అమ్మక సేంతుమ్ జలిసి

¹ జలె, నముకుమ్ వాట్ అమ్మచి పాపుమ్ వుంచి జా అన్నె. అమ్మచొ ప్రబు జలొ యేసు అమ్మచి పాపుమ్ వుంచిలి బలి జలి రిసొ దేముడు తెన్ అమ్మక సేంతుమ్ జలి. ² దేముడుచి దయచి రిసొ నముకుమ్ తెన్, జో అమ్మక రచ్చన దొర్కు కెర అన్నె. ఈంజ రచ్చన అమ్మక కేన్ వాట్ దొర్కు జా అన్నె మెలె, జో యేసుప్రబు అమ్మచి పాపుమ్ వుంచితి బలి జలి వాటు, అన్నె జా రచ్చన అమ్మక దొర్కు జలి తెంతొ, దేముడుచి పరలోకుమ్చి ఉజిడతె అమ్మ బెదుమ్దె మెలి ఆన అమ్మక దొర్కు జా అన్నె, చి అమ్మక ఒగ్గర్ సర్దసంతోసుమ్ జతసుమ్.

³ అన్నె కిచ్చొ మెలె, సుబుమ్ కబుర్ సూనయ్తి ప్రబు అమ్మక దిలి కామ్చి రిసొ, అమ్మ బాదల్ సేడ్డిన్చి రిసొ కి అమ్మక సర్దసంతోసుమ్. బాదల్ సేడ్డె ఓర్పుప జా, నిదానుమ్ సికుక జయెదె. ⁴ జేవ్ బాదల్ సేడ్డిసి అమ్మక ఏక్ పరిచ్చ కెర్లి రితి జయెదె, చి అమ్మ ఓర్పుప జా నిదానుమ్ సికిలె అమ్మక “పరిచ్చతె జిన్ల” మెన దేముడు జోచి సర్ద దెకవ అమ్మచి పెట్టి అమ్మక అన్నె ఆన దెయెదె, అమ్మక అన్నె దిట్టుమ్ కెరెదె, చి ⁵ జా ఆనచి రిసొ అమ్మ నంపజలిసి జెయిమ్ జయెదె, లాజు జము నాయ్. దేముడు అమ్మక దిలి దేముడుచి సుద్ది తిలి ఆత్మ తెన్ జోచి ప్రేమ అమ్మచి పెట్టి సువ బెరవయ్ దా అన్నె. జయి అమ్మక రుజ్జు.

⁶ అమ్మక కిచ్చొ నెక్తి నెంజిలి పొది, ‘చెంగిల్ సమయుమ్’ మెన అమ్మ పాపుమ్ సుదల్క సయ్తాన్చి రాజిమ్ తెంతొ రచ్చించుప కెర్లి రిసొయి క్రీస్తు మొర అమ్మచి రిసొచి అర్పితుమ్ జలన్. ⁷ జలె, పున్నిమ్ డీస్తొ కేన్ జవున్ మాన్సుక కిచ్చొ జవున్ బాద తెంతొ రచ్చించుప కెరుక మెన కో మాన్సుల్ సొంత జివు దెవుల గే? దెతి నాయ్. కేన్ గే ఏక్ సుట్టు కో

† 4:25 4:25 చి ఒత్త తెంతొ అమ్మక జో ‘పున్నిమ్’ మెలి రితి దెకిలిసి.

జువన్ చెంగిలో మాన్సుక రచ్చించుప కెరుక మెన కో జలెకు మాన్సు దయిరిమ్ జా మొరెదె. ⁸ గని, దేముడుచి ప్రేమ అమ్క కిసి రుజ్జు జతయ్ మెలె, అమ్ పాపుమ్ కెర్లస జా తతికయ్, అమ్క రచ్చించుప కెర్తి రిసా క్రిస్తు జోచి జివు దిలన్.

⁹ జలె, దొర్కు జలి అర్పితుమ్ జో దిలిన్చి లోయిచి రిసా అమ్చి పాపుమ్ అప్పె వుంచి జా అస్సెచి రిసా, అన్నె, దేముడు అమ్క దెంక తిలి సిచ్చ అమ్క నే లయతి రితి, జో యేసుయి పిట్టవ అస్సె. జా సిచ్చ అమ్ సేడుక నాయ్. ¹⁰ మెలె, దేముడుక అమ్ విరోదుమ్ సుదల్ జా తిలి పొది, అమ్చి పాపుమ్ గెచ్చయ్తి రిసా జోచొ వుత్తుసి మొర్లిసి, అమ్క జోతె అన్నె బెదవ దిలన్. కెయ మెలె, జోక అమ్ విరోదుమ్ జా తిలి పొది. జలె, అన్నె, అమ్ అప్పె జో తెన్ అన్నె బెదయ్ అస్సుమ్ జలె, జో అన్నె జివ్ జా, జివ్ తతిన్చి రిసా నానెనుమ్తె నే గెతె, పరలోకుమ్తె జోతె గెతి రచ్చన కచితుమ్ జమ్దె. ¹¹ జో, పడ్డొ అన్నె కిచ్చొ మెలె, అమ్చొ ప్రబు జలో యేసుక్రిస్తు జర్గు కెర్లిన్చి రిసా దేముడు అమ్క అన్నె బెదవన్లి రిసా, జో దేముడుచి తెడి అమ్ అప్పె అస్సుమ్చి రిసా, జోచి ఉప్పిరి అమ్క సర్లసంతోసుమ్ జతసుమ్.

ఆదామ్ తెంతొ మొర్ను యేసు తెంతొ జివుమ్

¹² ఎక్కిలో మాన్సు, తొలితోచొ మాన్సు జలో ఆదాము, పాపుమ్తె సెడ్లిన్ తెన్ ఒండి లోకుమ్తె పాపుమ్ అయ్లి, అన్నె పాపుమ్చి రిసా మొర్ను అయ్లి. జాకయ్ ఒత్త తెంతొ ఎత్కి మాన్సు పాపుమ్ కెర అస్తి, కెర్తతి, చి ఎత్కిజిన్క మొర్ను అయ్లి. ¹³ దస్సి, కచితుమ్, దేముడు ఆగ్గుల్ రితి నే దిలి అగ్గెయి తెంతొ ఈంజ లోకుమ్తె పాపుమ్ అస్సె. 'గని ఆగ్గుల్ రితి నెంజిలిన్తె జా పాపుమ్చి రుజ్జు సరిగా డీసె నాయ్, చి తీర్పు కెర సిచ్చ కెరుక నెంజె'. ¹⁴ జలెకి, ఆగ్గుల్ దిలిన్క *మదెనె జలో మోసే నే జెతె అగ్గె కి, తొలితోచొ ఆదాము తెంతొ కి

* 5:14 5:14 నిర్లమకాండుమ్ 19, 20 అద్యయల్.

మాన్యుల్క మొర్ను ఏలుప కెర్తె తిలన్. †వేర పాపల్ జేవ్ కెర్లె కి, దేముడుచి కోడు పిట్టవన్లొ ఆదాము కెర్లి రగుమ్ పాపుమ్ నే కెర్లసచి ఉప్పిరి కి మొర్నుయి ఏలుప కెర్తె తిలన్. జలెకి, పడ్డొ జెంక తిలొ యేసుక ‡తోలితోచొ ఆదాము అమ్క టాలి జతయ్. ఆదాము ఏక్ కాలుమ్క మొదొల్చొ, †పాపుమ్చి మొర్ను ఏలుప కెర్లి కాలుమ్. పడ్డొ యేసు అన్నెక్ కాలుమ్క మొదొల్చొ, పాపుమ్ గెచ్చవ పరలోకుమ్చి రాజిమ్ ఏలుప కెర్లి కాలుమ్. 15 పాపుమ్తె సేడ్లిన్క చి రచ్చన దిలిన్క తేడ. మెలె, ఎక్కిలో మాన్సు పాపుమ్ కెర్లిన్చి రిసా ఒగ్గర్జిన్ మొర్లమ్. గని దేముడుచి దయచి రిసా జో అన్నెక్లొ మాన్సు జలొ యేసుక్రీస్తు జోచి ప్రేమక ఆరి దిలి రచ్చనచి ఒగ్గర్జిన్క జో దేముడు నెతోవ కెరయ్ అస్సి. 16 అన్నె, జోచి దయక దేముడు దిలి వరుమ్క జర్గు జతిన్క చి జో ఎక్కిలో కెర్లి పాపుమ్క జర్గు జలిన్క ఒగ్గర్ తేడ. జా ఎక్కి పాపుమ్చి రిసాచి తీర్పు కిచ్చొ ఆన్లి మెలె, దేముడు దెతి సిచ్చ. గని, పడ్డొ, అమ్ ఎత్తిజిన్ మాన్సుల్ ఒగ్గర్ పాపుమ్ కెర కెర అమ్ కెర్ల పాపల్ ఒగ్గర్ నిల్వ జా గెలి పొది, జో దేముడు జోచి దయక దిలి రచ్చన కిచ్చొ ఆన్లి మెలె, అమ్చి పాపుమ్ వుంచ దిలిసి. 17 దేముడు సంగిలి *కోడు జో ఎక్కిలో పిట్టవ పాపుమ్తె సేడ్లిసి తెంతొ జా పాపుమ్చి సిచ్చ, మెలె మొర్నుయి, ఏలుప కెర్తయ్. జలెకి, అన్నె కిచ్చొ ముక్కిమ్క జర్గు జయెదె మెలె, జో అన్నెక్లొ జలొ యేసుక్రీస్తుచి అత్తి దేముడుచి దయచి రిసాచి, జో ఆరి దిలి పున్నిమ్ కక్క కక్క దొర్కు జయెదె గే, జితిన్తె, మెలె పరలోకుమ్చి రాజిమ్తె, జేవ్ †ఏలుప కెరుల. 18 దస్సి జలె, ఎక్కిలో పాపుమ్ కెర్లిసి కీసి ఎత్తిజిన్క సిచ్చతె సేడయ్లి గే, దస్సి, జో

† 5:14 5:14 ఆదాము తెన్ ఎత్తి అదికారుమ్ తిలొ దేముడు సొంత లట్టబ ఏక్ కోడు తిన్నగ సంగ తిలన్. తిన్నగ సంగిలి జా ఆడ్ర ఆదాము పిట్టయ్లన్. ఆదికాండుమ్ 2:15-17 చి 3 అద్యయిమ్. ‡ 5:14 5:14 1 కొరిందిల్ 15:22, 45 § 5:14 5:14 ఆదికాండుమ్ 3 అద్యయిమ్. * 5:17 5:17 14 నంబర్ కోడుచి ఎట్టొచి. 17 నంబర్? కోడు దెక. † 5:17 5:17 తిమోతిక రెగిడ్లి 2 నంబర్ ఉత్తమ్ 2:12. డీసయ్లిసి 5:10, 20:4, 6 చి 22:5.

అన్నెళ్లొ పున్నిమ్ కెర్లిసి †జోక నంపజల ఎత్కిజిన్చి పాపుమ్ పుంచ జోవయింక జియడ్డయ్. 19 మెలె, ఎక్కిలో మాన్సు దేముడు సంగిలి కోడు నే కెర్లిన్చి రిసా కీఎత్కిజిన్ పాపుమ్ సుదల్ జా గెలమ్. దస్సి, జో అన్నెళ్లొ, దేముడు అబ్బొన్చి కోడు సూన కెర్లిన్చి రిసా *ఒగ్గర్జిన్క 'జేవ్ పున్నిమ్ జల రిత జా అస్తి' మెన జో దేముడు కచితుమ్ దెకెదె.

20 ఆగ్గుల్ రితి మదెనె అయ్లి, గని కిచ్చొక మెలె, మాన్సుల్ పాపుమ్ ఇండితిన్చి రుజ్జు సొస్తుమ్ డీసున్ మెనయ్ దేముడు జా ఆగ్గుల్ రితి మదెనె దిలన్. గని మాన్సుచి పాపుమ్ దస్సి సొస్తుమ్ రుజ్జు జలెకి, అమ్క కిచ్చొ రుజ్జు అయ్లి మెలె, దేముడుచి దయ జా పాపుమ్చి జా ఆగ్గుల్ రితి జిన అన్నెయ్ కామ్ కెర్లి. 21 మెలె, పాపుమ్ మొర్ను ఆన, జా పాపుమ్ మొర్ను వాట్ కిసి ఏలుప కెర్తె తిలి గే, దస్సి, అమ్చొ ప్రబు జలో యేసుక్రీస్తు మొర అమ్చి పాపుమ్ పుంచ, జోచి పున్నిమ్ అమ్క ఆరి దిలిన్కయ్ జోచి దయ ఏలుప కెర్చు మెనయ్, దేముడుచి దయయ్ జిన అస్సె. అమ్క 'పరలోకుమ్చి రాజిమ్తె బెద పరలోకుమ్చి జివుక కెయ్క తెయ్క జియ్ ఆకర్కయ్ ఒత్తయ్ గెతు' మెనయ్ జా వరుమ్ దిలన్.

6

నంపజా పాపుమ్ ముల సత్తిమ్ ఇండుక

1 జలె, కిచ్చొ మెనుమ? 'అమ్చి పాపుమ్ దేముడు చెమించుప కెర్లిన్తె జోచి దయ ఒగ్గర్ డీసుక, ఒగ్గర్ అవ్కాసుమ్ దెమ' మెన అమ్ పాపుమ్ ఇండితె తంక గే? 2 దస్సి ఉచరుక నాయ్. పాపుమ్ ముల అమ్చి సొంత ఆత్మక మొర్ల రిత జలమ్ మెలె, పాపుమ్తె కిసి అన్నె ఇండుమ్దె? 3 యేసుక్రీస్తుచి నావ్ తెన్ బాప్తిస్మమ్ జల అమ్ ఎత్కిజిని, జలె, జో మొర పాపుమ్ గెచ్చయ్లిన్చి గుర్తు జతి

† 5:18 5:18 నెంజిలె 'పాపుమ్ పుంచి జతి అవ్కాసుమ్, జోవయింక రాజిమ్తె జతి అవ్కాసుమ్, ఎత్కిజిన్క దొర్కు కెర్తయ్'. గని దొర్కు కెర్తె కి, జా నజిలెకయ్. కిసి నజుక మెలె, యేసుక్రీస్తుకయ్ నంప కెరుకయ్. యోహాను 3:18, 1:12. § 5:19 5:19 3:10-12, 23 దెక. * 5:19 5:19 18 నంబర్ కోడు దెక.

బాప్తిసుమ్ కడన్లినతె జో మొర్లిన్ తెన్ బెదిల్ రితి, జా మొర్ల రిత జలమ్ మెన నేన్పు గే? 4 జో యేసుచి ఆగ్ మొర్లిన్తె అమ్ బెద, అమ్చి ఆత్మక మొర జో తెన్ రోయి జలి గుర్తుకయ్ అమ్ బాప్తిసుమ్ నజన్లమ్. దస్సి, అబ్బోన్ జలో దేముడుచి సెక్తిక క్రిస్తు కిసి మొర్పు తెంతో అన్నె జివ్ జా ఉట్లన్ గే, దస్సి, అమ్ ఈంజ బత్తుకయ్ నొవర్ జెర్మున్ జోచి ఆత్మతె జెర్మున్ జా సత్తిమ్ ఇండుకయ్ మెన, జో దేముడు అమ్క జియడ అస్సె.

5 జలె, జో మొర్లిన్తె ఆత్మక బెద జో తెన్ అంటుప జలి రితి జలమ్ మెలె, జో అన్నె జివ్ జా ఉట్టి జివుక కచితుమ్ ఆమ్ కి జిమ్దె, చి మదెనె ఆగ్క అమ్ మొర్లె, ఆకర్క జోచి రితి ఆమ్ కి జివ్ జా ఉట్టుమ్దె. 6 అమ్చి ఆగ్గుతె ఏలుప కెర్తె తిలి అగ్గెచి పాపుమ్బుద్ది పూర్తి గెస్సు మెనయ్, పాపుమ్చి సేవ అమ్ అప్పె తెంతో కెరుక నాయ్ మెనయ్, పాపుమ్ అమ్చి అగ్గెచి ఆత్మజో తెన్ సిలువతె గలి జా మొర్లి మెన జానుమ్. 7 అమ్చి పాపుమ్చి ఆత్మ మొర తిలె, పాపుమ్ అమ్క ఏలుప కెర్తిన్ తెంతో విడ్డల్ జా అస్సుమ్. 8 గని అన్నె, క్రిస్తు తెన్ మొర్లమ్ మెలె, 'జో తెన్ జిమ్దె' మెన కి అమ్క దయిరిమ్ అస్సె. 9 కిచ్చొక మెలె, క్రిస్తు మొర తా అబ్బోన్ అన్నె జియడ్డోసా జా కెయ్క అన్నె మొరె నాయ్ మెన జానుమ్. అప్పె జోచి ఉప్పిరి మొర్పుక కిచ్చొయ్ అదికారుమ్ నాయ్. 10 జో మొర్లిన్, జలె, మాన్పుల్చి పాపుమ్ గెచ్చయ్తి బలి జలిసి. జా కామ్, జలె, ఎక్కి సుట్టుక పూర్తి జెయిమ్ జలిసి, కేడ్డిసి. గని జో అప్పె జితిసి, జలె, దేముడుచి గవురుమ్ కెయ్క తెయ్క దెకయ్తి రితి జో జితయ్. జో మొర్లిన్ ఎక్కి సుట్టుచి కామ్, జోచొ అబ్బోన్చి గవురుమ్ దెకయ్తిసి కెయ్క తెయ్క చి కామ్, కేడ్డిసి నెంజె. 11 జాకయ్ తామ్ కి కిసి దెకనుక మెలె, 'అమ్చి పాపుమ్ గెలి. అమ్చి పాపుమ్చి ఆత్మ మొర్లి' మెనయ్, క్రిస్తు జలో యేసుచి జివుకయ్ నొవర్ జియ అస్సుమ్, చి దేముడుచి గవురుమ్ దెకయ్తి రితి అమ్ ఇండితె తంకయ్ మెన అర్దుమ్ కెరన దస్సి ఇండుక.

12 జాకయ్, మొర్ర తుమ్చ ఆగ్తె పాపుమ్ ఏలుప కెర్చు నాయ్, నెంజిలె తుమ్చి ఆగ్చె ఆసల్ జర్గు కెర్తె, పోన. 13 పాపుమ్ కమొ కెర్తె అయ్దల్ జేవ్ జతి రితి, పాపుమ్తె తుమ్చ ఆగ్చె వాటల్ తుమ్ బెదవ నాయ్. గని, 'మొర్చు తెంతో జో అమ్క నెతోవ కెర జో తెన్ బెదవన దేముడు అమ్క జియడయ్ అస్సె, అమ్క జివ్వి కెర అస్సె' మెనయ్, జోచి అత్తి తుమ్చి అత్మ సార్చ కెర దా, జోచి సత్తిమ్ దెకయ్త కమొచి రిసాచ అయ్దల్ జేవ్ జతి రితి, తుమ్చ ఆగ్చె వాటల్ జోచి అత్తి సార్చ కెర దాన. 14 జోచి అత్తి సార్చ కెర దిలదు మెలె తుమ్చి ఉప్పిరి పాపుమ్ ఏలుప కెరె నాయ్. కిచ్చొక మెలె, తుమ్ ఆగ్గుల్చి రితి తెడి నాయ్, గని జో దేముడుచి దయచి తెడి అస్సున్.

15 జలె, 'అప్పె ఆగ్గుల్ రితి తెడి ఆమ్ నాయ్. జోవయించి దయక దేముడు అమ్క చెంగిల్ దెకితయ్, చి అమ్ పాపుమ్ కెర్లె బాద నాయ్' మెంతసు గె? దస్సి ఉచరుక నాయ్. 16 జోచి సేవ కెరుక మెన కచి అత్తి తుమ్క తుమ్ ఒప్పున కెరన తస్తె గే, జోచయ్ గొతిమాన్సుల్ జా అస్సున్ మెన నేన్చు గే? పాపుమ్తె సార్చ కెరనె, పాపుమ్చ గొతిమాన్సుల్ జస్తె, చి మొర్చుతె గెతె. దేముడుచి కోడు కెర్తెనె ఒప్పున కెరంతె జలె, జో దెతి పున్సిమ్ జస్తె.

17 దేముడుక జెయ్యి! పాపుమ్చి సేవ కెర పాపుమ్చ గొతిమాన్సుల్ తుమ్ అగ్గె జా తిలదు, గని తుమ్క అప్పె సికడ్లి తుమ్క అప్పె దిలి కోడ్ రితి ఇండుక తుమ్చి పెట్టి కోర్ప జా అస్సున్. 18 అన్యె, పాపుమ్ ఏలుప కెర్తెసి తెంతో దేముడు తుమ్క విడ్డల్ కెర, సత్తిమ్ ఇండితిన్క తుమ్ గొతిమాన్సుల్ జతి రితి కెర అస్సె. 19 మాన్సుల్ రోజుక అర్దల్ సంగితి రితి, టాలిక్య 'గొతిమాన్సుల్' మెంతసి. కిచ్చొక మెలె, అత్మకమొచి రిసాచ కొణొ అర్దుమ్ కెరనుక తుమ్క ఇదిల్ బాద, చి 'అర్దుమ్ కెరంతు' మెనయ్ ఇసి టాలి తెన్ సంగితసి. జా అర్దుమ్ కిచ్చొ మెలె, లంజె వెట్కారుమ్చ కమొతె, పాపుమ్చి ఉప్పిరి పాపుమ్చ కమొతె తుమ్చ ఆగ్చె వాటల్ అగ్గె బెదవంతె తిలదు, గని అప్పె తెంతో తుమ్ కిచ్చొ కెరుక మెలె, దేముడు తుమ్క దిలి సుద్ది పూర్తి

నెరవెర్చువయ్ జతి రితి, సత్తిమ్ కమొక ఇండితిన్తెయ్, తుమ్చ ఆగ్చ వాటల్ తుమ్ సొర్చ కెర దాస.

20 పాపుమ్చి సేవ కెర్త పాపుమ్చ గొతిమాన్సుల్ తుమ్ తిలి పొది సత్తిమ్ ఇండితి ముద్దొతెను నాయ్, 'ఆమ్ సత్తిమ్ ఇండుక నాయ్' మెన ఇస్టుమ్ అయ్లి రితి ఇండితె తిలదు. 21 గని జా పొదిచ తుమ్చ కమొచి రిసా అప్పె ఉచర్లె తుమ్క లాజు. జేవ్ కమొ తుమ్క కిచ్చొ లాబుమ్ ఆన్ల? కిచ్చొ పలితుమ్ దెర్ల? లాబుమ్ నాయ్, కిచ్చొ చెంగిల్ పలితుమ్ నాయ్. దన్స కమొ మాన్సుక కేనె నెతతి మెలె, నాసెనుమ్తె, మొర్చుతెయి. 22 గని, పాపుమ్ ఏలుప కెర్తిన్ తెంతొ విడ్డల్ జా దేముడుచ గొతిమాన్సుల్ తుమ్ జలి తెంతొ, అప్పె కిచ్చొ పలితుమ్ దెర్తయ్ మెలె, జోదెతి సుద్ది జా, తుమ్ సుద్ది రితి ఇండితను, చి జోదెతి సుద్ది తుమ్క పరలోకుమ్తె బెదయ్తయ్, తుమ్క కెయ్క తెయ్క జియ్డయ్.

23 జలె, పాపుమ్ జేవ్చి సేవ కెర్తసక బట్వాడి మొర్చుయి. గని, దేముడు జోవయిచి సర్క అమ్క ఆరి దిలి వరుమ్, అమ్చొ ప్రబు జలొ యేసుక్రీస్తుచి తెడి పరలోకుమ్తె గెచ్చ కెయ్క తెయ్క జితిసి.

7

ఆగ్గుల్ తెంతొ విడ్డల్ జా క్రీస్తుచి తెడి తిలిన్

1 జలె, దేముడు మోసే తెన్ దిలి ఆగ్గుల్ జాన్ల బావుడ్డు, మాన్సు మొర తిలె నాయ్, గని జివ్వి తిలె పొదికయ్ జోచి ఉప్పిరి ఆగ్గుల్క అదికారుమ్ తయెదె మెన నేన్సు గే? 2 గని, కేన్ జుప్స్ తేర్బోదచొ మున్సుసి జివ్వి తిలి ఎదిలి, ఆగ్గుల్చి రిసా జోచి తెడి జా తయెదె, జా ఆగ్గు పిట్టవుక నెంజె. గని మున్సున్ మొర గెలె, తెర్నిమున్సు చెంగిల్ తతి జా ఆగ్గు జేవ్చి ఉప్పిరి తయె నాయ్. 3 జాకయ్, మున్సుసి జీవ్ తిలె పొది జా తేర్బోద అన్నెక్లొక గెలె, జాక 'లంజె' మెనుల, గని మున్సుసి మొర గెలె, జా ఆగ్గు ముద్దొ కెర్తిన్ తెంతొ జా పిట్టవ జా అస్సె, చి అన్నెక్లొక పెండ్లి జలె లంజె నెంజె.

4 దస్సి, బావుడ్లు, క్రీస్తుక నంప కెర జో తెన్ తుమ్ బెదిలి రిసా, జో యేసుక్రీస్తుచి ఆగ్గే మొర్లిన్ తెన్ తూమ్ కి మొర అస్సున్, చి రిసా తుమ్చి ఉప్పిరి ఆగ్గుల్క అదికారుమ్ నాయ్. దస్సి, తుమ్ అప్పె ఆగ్గుల్చి తెడి నాయ్ చి రిసా తుమ్ అన్నెక్లొచి అదికారుమ్చి తెడి తంక వాట్ తవున్ మెనయ్ దేముడు ఇసి జర్గు కెర్లన్. జో దేముడుచి గవురుమ్ దెకయ్తి రితి అమ్ ఆత్మపలితుమ్ దెరుక మెనయ్, మొర జివ్ జా ఉట్టో జో క్రీస్తుచి తెడి అమ్ తంకయ్ మెనయ్ ఇసి జర్గు కెర్లన్. 5 ఈంజ ఆగ్గేచ అమ్చి పాపుమ్చ ఆసల్క అమ్ జితె తిలి పొది ఆగ్గుల్ అమ్చి పెట్టిచ ఆసల్క 'పాపుమ్చయ్' మెన దెకయ్తె తిల, చి జేవ్ ఆగ్గుల్ 'దన కమొ పొన' మెన సంగితికయ్, జేవ్ పాపల్ కెర్తి ఆస ఒగ్గర్ జా గెలి. పాపుమ్ కెర్తి జా ఆస ఒగ్గర్ జా అమ్చి ఆగ్గేచ వాటల్తె బార్ జా జేవ్చి కామ్ కెర్తె తా మొర్ను ఆస్తి పలితుమ్ దెర్తె తిలి. 6 గని అప్పె, క్రీస్తు తెన్ బెద అమ్ 'మొర్లి' తెంతో, ఆగ్గుల్ తెంతో పిట్టవ జా అస్సుమ్. అమ్క దెర బంద తిలి జా ఆగ్గుల్క అమ్చి ఉప్పిరి అదికారుమ్ నాయ్ చి రిసా రెగిడ్ల ఆగ్గుల్చి తెడి నాయ్ గని దేముడుచి సుద్ది తిలి ఆత్మకయ్ నొవర్ జెర్మున్ జా, జయ్యి సెక్తికయ్ జోచి సేవ కెర్తసుమ్.

ఆగ్గుల్తె పాపుమ్ వాట్ చజ ఒగ్గర్ జా గెతిన్

7 జలె, కిచ్చో మెనుమ? 'ఆగ్గులీ పాపుమ్' మెనుక జయెదె గే? నెంజె. దస్సి మెనుక జయె నాయ్. గని ఆగ్గుల్ తత్త నాయ్ జలె, 'ఆవ్' మెనుమ, 'ఆవ్ పాపుమ్ కెర్లొసా' మెన ఆవ్ సరిగా చినంతయ్ నాయ్. "అన్నె మాన్సుల్చి ఆస్తిక ఆస జా నాయ్" మెన ఆగ్గుల్తె తత్తి నాయ్ జలె, అన్నెక్లొచి ఆస్తిక ఆస జతిన్క 'పాపుమ్' మెన నేనీతయ్, ఆవ్ కి దస్సి పాపుమ్ కెర్తిసి చినంతయ్ నాయ్. 8 గని, పాపుమ్బుద్ది అంచి పెట్టి అగ్గె తెంతో తిలన్, చి "అన్నె మాన్సుల్చి ఆస్తిక ఆస జా నాయ్" మెన ఆగ్గుల్తె తతికయ్, అంచి పెట్టిచి పాపుమ్ బుద్దికయ్ "దస్సి జలె, అన్నె మాన్సుల్చి ఆస్తిక ఆస జయిందె" మెనయ్ ఆస జలయ్, చి అన్నె ఒగ్గర్ ఆసల్, కిచ్చో కిచ్చోచ

అనల్ ఎత్తి జలయ్. ఆగ్నల్ నేన్లె, అమ్చి పాపుమ్ నిజల్ రితి, జీవ్ నెంజిల్ రితి తా కామ్ కెరె నాయ్. ⁹ 'ఆవ్' మెనుమ, అగ్గెయి ఆగ్నల్చి తెడి నే తస్సె, అంచి పాపుమ్క 'అస్సె' మెన నేన కెర, అంచి ఇస్టుమ్ అయ్లి రితి సర్ల తెన్ జితె తిలయ్, గని జా ఆగ్న సూన్లి తెంతో పాపుమ్ అంచి పెట్టి అన్నె జీవ్ జలన్, చి ఆవ్ మొర్లయ్. ¹⁰ దస్సి, 'జీవ్ దెతి వాట్ దెకయెదె' మెన ఆవ్ నంప కెర్లి ఆగ్న అంక మొర్లి సిచ్చ ఆన్లన్. ¹¹ కిసి మెలె, పాపుమ్బుద్ది అంక మోసిమ్ కెర, 'చెంగిల్' మెన ఆవ్ నంప కెర్లి ఆగ్న వాటీ బార్ జలన్. ¹² మెలె, దేముడు మోసే తెన్ దిలి ఆగ్నల్ సుద్ది అస్తి, ఒత్తచి ఎత్తి ఆగ్న సుద్ది అస్సె, సత్తిమ్చ తీర్పుల్ దెకయ్తయ్, చెంగిల్ అస్సె.

¹³ దస్సి జలె, 'ఆవ్' మెనుమ, చెంగిల్చి అంక మార్లన్ గే? నాయ్. ఆగ్నల్ చెంగిల, గని జా చెంగిల్ తిలిన్చి ఆగ్న పిట్టవ పిట్టవ, పాపుమ్ అంచి పెట్టి జేవ్చి కామ్ కెర కెరయి మార్లి. దేముడుచి సెలవ్ కిచ్చొ మెలె, ఆగ్నల్ వాట్ పాపుమ్ జేవ్చి కామ్ కెర్తె తతినెతయి పాపుమ్క, పాపుమ్ మెన మాన్సుల్ చినుత్ మెనయ్, పాపుమ్ ఆగ్నల్ వాట్ పుల పుల కెర్లి మూర్కుమ్ జా గెతయ్ గే చినుక నెంజిలిన్చి జేవ్చి కామ్ పూర్తి డిసుకయ్ మెన, దేముడు సెలవ్ దిలన్.

¹⁴ జలె, దేముడు మోసే తెన్ దిలి ఆగ్నల్క దేముడుచి సుద్ది తిలి ఆత్మకయ్ దిలస, జోచి ఆత్మతయ్ బెదితస, మెన ఆమ్ జానుమ్, గని ఆవ్ మాన్సుక మాములుమ్ మాన్సుచి ఆగి, మాములుమ్ మాన్సుచి బుద్ది అస్సె, చి ఈంజ ఆగ్తె ఆవ్ తతి ఎదిలి సేంపు పాపుమ్ అంక నేన్లి రితి అస్సె. పాపుమ్చి గొతిమాన్సు ఆవ్. ¹⁵ ఆవ్ సొంత ఇండితిసి ఆవ్ అర్దుమ్ కెరనుక నెతిర్తసి. 'సత్తిమ్ కెరిందె' మెలె కి నెత్త తా, 'గర్చి' మెన ఆవ్ నెసితిసి ఆవ్ జర్లు కెర గెల సిక్కు జా గెతసి.

¹⁶ జలె, 'పాపుమ్' మెన ఆవ్ నెసితిసి ఆవ్ కెర్తసి జలె, జా పాపుమ్ నెసిలిసి తెన్ 'దేముడు దిల ఆగ్నల్ చెంగిలి' మెన ఒప్పున్లి రితి జతయ్. ¹⁷ తెడిక తెడి దేముడుక ప్రేమ కెర్తొ అవ్వి జా పాపుమ్

కెర్టోసా నెంజి, గని ఆవ్ మాన్సుచి ఆగి తిలి పాపుమీ జా కామ్ కెర్తయ్. 18 మెలె, అంచి సొంత సెక్తిక, అంచి ఆగి, అంక కిచ్చొ సత్తిమ్ నాయ్ మెన జాని. 'చెంగిల్చి కెరిందె' మెన ఉచరిందె, గని మాన్సుచి అంచి సెక్తిక జర్గు కెరుక నెతిరి. 19 నెత్త, 'చెంగిల్' మెన ఆవ్ ఇస్టుమ్ జలిసి జర్గు నే కెర్తె, నెసిలి పాపుమ్ జర్గు కెరయ్ గెల్తసి. 20 జలె, 'పాపుమ్' మెన ఆవ్ నెసితిసి ఆవ్ కెర్తసి జలె, దేముడుక ప్రేమ కెర్తొ అచ్చొ జర్గు కెర్లిసి నెంజె, గని అంచి అగి జేవ్చి ఇస్టుమ్ కెర, పాపుమీ జర్గు కెర్తయ్.

21 దస్సి, కిచ్చొ ఆగ్గు డీస్తయ్ మెలె, 'సత్తిమ్ కెరిందె' మెన ఆవ్ ఉచరెల్లె పొది, పాపుమ్ పాసి రకితె అస్సె. 22 మెలె, అంచి పేట్ తెడి దేముడు మోసే తెన్ దిలి ఆగ్గుల్ రిసా ఇస్టుమ్ కెరుక ప్రేమయ్ అస్సి, 23 గని అంచి అగి కిచ్చొ ఆగ్గు జర్గు జతిసి ఆవ్ చినితసి మెలె, అంచి మెన్సుతె తిలిన్చి ఉప్పిరి జా వేరచి యుద్దుమ్ కెర, అంచి ఆగిచ వాటల్ తెన్ నెరవెర్పుప జతి పాపుమ్తె అంక దెర్ను సేడయ్తయ్. 24 అయ్యొ! కెద్ది బాద సేడ్తసి, జా ఎత్కి రిసా! మొర్ను ఆన్తి ఈంజ పాపుమ్చి ఆగ్గె తెంతొ కో అంక రచ్చింఛుప కెరుల? 25 అమ్చొ ప్రబు జలొ యేసుక్రీస్తుచి రిసా దేముడుక జోబర! జొయ్యి రచ్చింఛుప కెరెదె! జొయ్యి అమ్క జీనవ అస్సె! జలె, అప్పెచి మట్టుక అంచి మెన్సుక, జో తిలి ఆత్మక, దేముడు మోసే తెన్ దిలి ఆగ్గుల్చి రిసా దేముడుచి సేవ ఆవ్ కెర్తసి, గని అంచి ఆగ్గెక పాపుమ్చి సేవ కెర్తసి.

8

యేసు అమ్క పాపుమ్ తెంతొ మొర్ను తెంతొ పిట్టవ కెర్లిసి

1 జలె, క్రీస్తు జలొ యేసుచి తెడిచ మాన్సుల్క జో జోచి పాపుమ్ పుంచ అస్సెచి రిసా లోకుమ్చ ఎత్కిక జో తీర్పు కెర్తి పొది జేవ్క కిచ్చొ సిచ్చ జంక నాయ్. నాసెనుమ్తె జేవ్ గెచ్చుక నాయ్. 2 కిచ్చొక మెలె, అమ్క ఏలుప కెర్తె పాపుమ్ చి మొర్నుచి ప్రమానుమ్చి సెక్తి తెంతొ జీవ్ దెతి దేముడుచి సుద్ది తిలి ఆత్మచి ఆగ్గుతె అమ్క పిట్టవ కెరయ్

అస్సె. జో యేసుచి అత్తి, యేసుతె జర్గు జలి కామ్వాట్ విడ్డల్ కెరయ్ అస్సె. ³ మెలె, మాన్సుచి ఆగి పాపుమ్ ఏలుప కెర్తయ్. అమ్చి ఆగి ఏలుప కెర, ఆగ్గుల్ నెరవెర్చుప కెరుక తిలిసి పాపుమ్ పిట్టయ్లి. జాకయ్ ఆగ్గుల్ అమ్చి పాపుమ్ గెచ్చువుక అమ్క చెంగిల్ కెరుక నెత్తిర్తి. జలె, దేముడు అమ్చి పాపుమ్ గెచ్చువ అమ్క సుద్ది కెరుక మెన మాన్సుచి ఈంజ పాపుమ్చి ఆగ్ రూపుమ్ జోచొ సొంత పుత్తున్క ఈంజ లోకుమ్తె తెద్దయ్లన్. దస్సి పాపుమ్ పుంచితీ బలి జో జతి రిసా అమ్చి అగి కామ్ కెర్తి పాపుమ్ జాక జెతికయ్, జో యేసుచి ఆగ్ వాట్ పాపుమ్క సిచ్చ కెర గెల తీర్పు కెర్లన్*. ⁴ కిచ్చొక పాపుమ్క తీర్పు కెర్లన్ మెలె, ఆగ్గుల్తె నంగిలి దొర్కు జలి పున్నిమ్ అమ్చితె నెరవెర్చుప జపున్ మెనయ్. కచితె మెలె, అమ్చి ఆగ్చ అసల్క నాయ్ గని దేముడుచి సుద్ది తిలి ఆత్మచి సెక్తికయ్ కో ఇండుమ్దె గే, అమ్మి.

⁵ మాములుమ్ మాన్సుచి బుద్దిక, ఈంజ ఆగ్చ అమ్చి పాపుమ్చ అసల్క కో జితతి గే, ఈంజయి లోకుమ్తె తిలిన్ ఎత్కిక, ఈంజ ఆగ్చ అసల్ తిలిన్ ఎత్కికయ్ కోర్ప జతతి, ఉచర్తె తత్తతి. గని దేముడుచి సుద్ది తిలి ఆత్మచి సెక్తిక కో జితతి గే, జా ఆత్మయి సికడ్డిన్కయ్ కోర్ప జతతి, ఉచర్తె తత్తతి. ⁶ ఈంజయ్ లోకుమ్చి, అమ్చి ఆగ్చ అసల్ జర్గు కెర్తిన్క కోర్ప జతిసి మాన్సుక మొర్చుతె నెయెదె, గని దేముడుచి సుద్ది తిలి ఆత్మక కోర్ప జతిసి అమ్క జివు దెతిసి, సేంతుమ్ దెతిసి జాఁ అస్సె. ⁷ మెలె, ఈంజ లోకుమ్చ, అమ్చి ఆగ్చ అసల్ జర్గు కెర్తిన్క కో కోర్ప జతతి గే, జో ఎత్కి అదికారుమ్ తిలొ దేముడుక విరోదుమ్ జా అస్తి, విరోదుమ్ కెర్తతి. దస్సి పాపుమ్చి ఆత్మ తిలస దేముడుచి ఆగ్గుల్ సూన్తి నాయ్, కెర్తి నాయ్. నెత్తిర్తి. ⁸ మాములుమ్ మాన్సుచి జోచి సొంత బుద్దిక, జోచి ఆగ్చ అసల్క ఇస్టుమ్ అయ్లి రితి ఇండితస, దేముడుచి ఇస్టుమ్ కెరుక నెత్తిర్తి, జోక సర్ల కెరుక నెత్తిర్తి.

* **8:3** 8:3 యోహాను 12:31-33 దెక, కొలోస్సియుల్ 2:15 దెక.

9 తుమ్, మాత్రమ్, మాములుమ్ మాన్సుచి పాపుమ్బుద్దిచ నెంజున్, ఈంజ ఆగ్చ ఆసల్క జితస నెంజును, నాయ్ గెద? దేముడుచి సుద్ది తిలి ఆత్మ తుమ్చి పెట్టి అస్సి జలె, జోచి ఆత్మకయ్ జితసు. కేన్ మాన్సుచి పెట్టి క్రీస్తుచి ఈంజ ఆత్మ తయె నాయ్ గే, జో మాన్సు క్రీస్తుచో నెంజె. 10 తుమ్చి పాపుమ్చి రిసా తుమ్చ ఆగ్ మొర్ల రిత జా అస్తి, గని క్రీస్తు తుమ్చి పెట్టి అస్సి జలె, క్రీస్తుచి పున్నిమ్చి రిసా జోచి ఆత్మక తుమ్ జివ్వి అస్సున్. 11 జో యేసుక అన్నె జియడ్లో దేముడు అబ్బొన్చి ఆత్మ తుమ్చి పెట్టి జితయ్ జలె, క్రీస్తు జలో జో యేసుక మొర్లు తెంతో విడ్డల్ కెర జియడ్లో జో అబ్బొసి, మొర్ల తుమ్చయ్ ఆగ్క కి జియడెదె. తుమ్చి పెట్టి జితి జోచి ఆత్మవాటు, తుమ్చి పెట్టి జో దెతి జోచి ఆత్మకయ్ జియడెదె.

యేసు తెన్ అమ్ అబ్బొన్చ పుత్తర్లు

12 జాకయ్, బావుడ్లు, అమ్ పూచి జా అస్సుమ్. జా పూచి అమ్ కిసి కుట్టవుక? మాములుమ్ మాన్సుచి బుద్దిక నాయ్, అమ్చి ఆగ్చ ఆసల్ జర్గు కెర్తినక నాయ్. జా ఎత్కి పొన. 13 కిచ్చొక మెలె, మాములుమ్ మాన్సుచి బుద్దిక, తుమ్చి ఆగ్చ ఆసల్క, తుమ్ జితసు జలె, ఆత్మక మొర్తె. గని దేముడుచి సుద్ది తిలి ఆత్మచి సెక్తిక ఈంజ ఆగుచ కమొ గెచ్చవనయ్ గెల్తె జలె, మార్తె జలె, ఆత్మక జిస్తె. 14 కిచ్చొక మెలె, దేముడుచి సుద్ది తిలి ఆత్మసెక్తిక ఇండితో ఎత్కి మాన్సు, జో దేముడుచి పుత్తర్లు జవుల. 15 మెలె, జోచి ఆత్మ తుమ్చి పెట్టి అయ్లిసి తుమ్క గొతిమాన్సుల్ కెర బియడ్డిసి నెంజె. తుమ్చి అగ్గచి బుద్దిచి రిసాచి బిడ్డి తెన్ తుమ్ అప్పె తంక నాయ్. జోచి ఆత్మ తుమ్చి పెట్టి అయ్లిసి తుమ్క జోవయించ పుత్తర్లులి కెర్లిసి. అప్పె “అంచ పుత్తర్లు తుమ్” మెన జో అమ్క దెకితయ్, చి “ఓ బ, ఓ బ” మెన జోక అమ్ ఉంక్రయ్లె, కిచ్చొ సెక్తిక ఉంక్రయ్తసుమ్ మెలె, 16 జోచ బోదల్ అమ్ జలిన్చి రిసా, జోచి సాంత ఆత్మ అమ్చి ఆత్మతె జోచ బోదల్ మెన సాచి దెతయ్చి, దస్సి ఉంక్రయ్తసుమ్. 17 అన్నె,

జోవయించ బోదల్ జలమ్ మెలె, జోచి పుత్తున్ జలొ క్రిస్తు తెన్ జో దేముడుక తిలిన్తె అమ్క వాట జెయెదె. జా వాట అమ్క కీసి సేడెదె మెలె, జో యేసు సేడ్ల బాదల్తె అమ్ బెద ఓర్పువ జా జీన్లె, జోచి పరలోకుమ్తెచి ఉజ్జెడతె జో గవురుమ్ జతిన్తె కి బెదుమ్దె.

18 జలె, బాదల్ సేడ్లిన్చి రిసా, చి యేసు తెన్ అమ్ గవురుమ్ జతిన్చి రిసా కిచ్చొ మెంతసి మెలె, దేముడు జా ఆకర్ దీసిక అమ్క కెర్తి గవురుమ్చి రిసా ఉచర్లె, ఈంజ ఉగుమ్చ బాదల్ కెత్తి జలెకి కిచ్చొ నెంజె. 19 జో దేముడుచ పుత్తర్లు అమ్ జలిసి, జా దీసిక అమ్ గవురుమ్ జతిన్తె పూర్తి రుజ్జు జతె ఎదక జెర్మయ్లీన్ ఎత్తి ఆస తెన్ రకితె అస్సె. 20 కిచ్చొక మెలె, తయార్ జలిన్ ఎత్తి అగ్గె తెంతో కిచ్చొ కిచ్చొ అల్లర్ సేడ సిక్కు జా అస్సె. జాచి ఇస్తుమ్క నాయ్, గని “కచితుమ్ సమయుమ్ జా అయ్లి మెలె చెంగిల్ కెరిందె” మెన దేముడుచి సెలవ్ నెరవెర్పువ జతిన్కయ్ ‘కచితుమ్ జర్గు జయెదె’ మెలి రితి దయిరిమ్ తెన్ తిలి రితి రకితయ్. 21 మెలె, దేముడుచ బోదల్ పూర్తి విడ్డల్ జా గవురుమ్ జతి పొదిక జెర్మయ్లీన్ ఎత్తి కి జా పాడ్ జతిన్తె నాసెనుమ్ జతిన్తె సేడ్లిన్ తెంతో విడ్డల్ జయెదె.

22 తేరబోద లడెన్ జంక మెన కంట్లు పాచ జా అయ్లి పొది కీసి కన్టల్ నొప్పుల్ జా టింకితయ్ గే, దస్సి, జెర్మన్ జలిన్ ఎత్తి మొత్తుమ్ అప్పె ఎద కన్టల్ నొప్పుల్ తెన్ టింకయ్తయ్ మెన జానుమ్. 23 తెద్దిలి నాయ్ అమ్క జెతికయ్ దేముడుచి సుద్ది తిలి ఆత్మచి మొదోల్చి పంటో అమ్చి పెట్టి అస్సె. జలె, “అమ్చ ఆగ్గక, ఈంజ లోకుమ్చ బాదల్ ఎత్తి తెంతో, దేముడు అన్నె గెనల్లిసి, అమ్ జోచ పుత్తర్లు జలిసి, కెయ్లక పూర్తి డీసెదె? అమ్ అన్నె కెద్ది రకుక?” మెన ఆమ్ అమ్చి పెట్టి టింక టింకయ్ రకితసుమ్. 24 ‘అమ్చ ఆగ్గక మార్పువ కెర్తిన్ జో జర్గు కెర్తిన్కయ్ జో అమ్క రచ్చించుప కెర అస్సె’ మెనయ్ ఆస తెన్ రకితసుమ్. జలె, ఉచరుమ, దెకిలిసి జర్గు జలిన్కయ్ ‘ఆస తెన్ రకితసుమ్’ మెనుక బెదె నాయ్. దెకిలిసి జర్గు జలిన్కయ్ కో ఆస తెన్ రకితి నాయ్. 25 గని అప్పెక నే దెకిలిన్క ‘కచితుమ్ జర్గు జయెదె’ మెన అమ్క ఆస తిలె, నిదానుమ్ తెన్ రకుమ్దె.

అమ్మచ ప్రార్థనలతె కి దేముడుచి సుద్ది తిలి ఆత్మ అమ్మక తోడ్ తతిస్

26 దేముడుచి సుద్ది తిలి ఆత్మ అమ్మక సెక్తి నెంజిలిన్ ఎత్తితె కి అమ్మక తోడు తత్తయ్. ప్రార్థన కెరుక జలె, కిసి ప్రార్థన కెర్కుగే నేనుమ్, గని దేముడుచి సుద్ది తిలి ఆత్మ సొంత అమ్మచి పెట్టి అమ్మచ ప్రార్థనలతె బెద అమ్మ లట్టబుక నేన్లిన్, నంగుక నెత్తిర్లిన్క తోడు తత్తయ్, అమ్మక సికడ్డయ్, చి అమ్మ నంగుక నెత్తిర్లిన్క లట్టబుక నేన్లిన్క అమ్మచి పెట్టి అమ్మ బింకితిన్చి అర్దుమ్ బెదయ్తయ్. 27 జలె, జోచి సుద్ది తిలి ఆత్మ అమ్మ జోచయ్ జల అమ్మచ ప్రార్థనలతె తోడు తా, దేముడుచి ఇస్టుమ్ తిలిసి ఒత్త బెదయ్తయ్. జోచి ఆత్మ కిచ్చొ అర్దుమ్ బెదయ్తయ్ గే జోయ్యి జానె. దస్సి, అమ్మచి పెట్టి తిలిన్ ఎత్తి పరిచ్చు కెర్తొసొచి ఆత్మ సొంతయ్ అమ్మచ ప్రార్థనలతె అమ్మక తోడ్ తత్తయ్, బెదితయ్.

దేముడు అమ్మక జినయ్తిసి డిట్టుమ్ కెర్తిసి

28 అన్నె కిచ్చొ దయిరిమ్ జతసుమ్ మెలె, దేముడుక ప్రేమ కెర్లనక, మెలె జోచయ్ జంక మెన దేముడు జోచి ఇస్టుమ్క బుకార్లనక కిచ్చొ బాదల్ అయ్లె కి, జేవ్ బాదల్తె కి చెంగిల్ పలితుమ్ దెర్తి రితి జా ఎత్తి చెంగిల్క బెదిత్ రితి జో నెరవెర్సుప కెర్తయ్ మెన జానుమ్. 29 కో యేసుక్రీస్తుక నంపజా జో దెతి రచ్చన నజనుక గే జో దేముడు అగ్గె తెంతో జానె. జలె, జోచొ సొంత పుత్తున్ యేసుచ రిత అమ్మ జంక మెన అమ్మకయ్ జో నిసాన, జా జర్గు కెరుక ఒప్పున్. దస్సి, అమ్మ ఒగ్గర్ ఒగ్గర్ బావుడ్డివొ జలనక యేసు తొల్పర్ జలన్. 30 జలె, 'యేసుచ రిత జతు' మెన జో కక్క కక్క నిసాన్ల గే, జోవయింక బుకార్లన్. కక్క కక్క బుకార్లన్ గే, జోవయించి పాపుమ్ పుంచ 'అప్పె తెంతో పున్నిమ్ జా అస్తి' మెలి రితి దెకిలన్, చి కచి కచి పాపుమ్ పుంచ 'పున్నిమ్ జా అస్తి' మెలి రితి దెకిలన్ గే, "జోవయింక పరలోకుమ్తె కడ నెయిందె, అంచి ఉజిడ్తె అంచి గవురుమ్తె బెదయిందె" మెనయ్ ఒప్పున్, చి జర్గు కెరెదె.

31 జలె, ఈంజ ఎత్కి బెదవ కిచ్చొ మెనుమ? దేముడు అమ్క తోడు అస్సె జలె, కో అమ్క పాడ్ కెరుక తెరితి! నెత్తిరి! 32 జోచొ సొంత పుత్తున్క బాదల్ నే పిట్టయ్తె, అమ్ ఎత్కిజిన్క పాపుమ్ తెంతొ రచ్చించుప కెర్తి రిసా జోక బలి కెర మొర్నుతె సార్పు కెర దిలో. అమ్చి ఉప్పిరి జోవయింక తెద్ది ప్రేమ తిలి జలె, జో పుత్తున్క దెతిసి ఎత్కితె అమ్క కి వాట దెయె నాయ్ గే? దెయెదె.

33 దేముడు నిసాన్లచి ఉప్పిరి కో కిచ్చొయ్ నింద వయడుక తెరితి గే? కోయి నెత్తిరి! జో దేముడు సొంతయ్ అమ్చి పాపుమ్ పుంచ అస్సె. అమ్క 'పున్నిమ్' మెలి రితి దెకితయ్. 34 అమ్ జో నిసాన్లసక కో తీర్పు కెర, నాసెనుమ్తె తెద్రవుక తెరితి గే? కో నెత్తిరి! మొర అన్నె ముక్కిమ్క అన్నె జీవ్ జా ఉట్టిలో క్రీస్తు జలొ యేసు అబ్బొన్ దేముడుచి ఉజెతో పక్క వెస అస్సె. జొయ్యి అమ్క సిచ్చ దెయెదె గే? నాయ్. జో సొంత అమ్చి వచ్చెనచి తీర్పు సంగితయ్. 35 జలె, క్రీస్తుచి ప్రేమ తెంతొ కో జలెకి కిచ్చొ జలెకి అమ్క పిట్టవ కెరుక తెరితి గే? జోవయింక అమ్క వీడుప కెరుక బాదల్ జవున్ తెరతి గే? ఇర్ముల్ జవున్ తెరతి గే? మాన్సుల్ కెర్త గోనల్ అల్లర్ తెరితి గే? చువ్వె తతిసి జవున్ తెరె గే? పాలల్ నెంజిలిన్ జవున్ తెరె గే? ప్రమాదల్ జవున్ తెరితి గే? మొర్తి సిచ్చ జవున్ తెరె గే? కిచ్చొయ్ అమ్క జోక వీడుప కెరుక నెత్తిరి! 36 దేముడుచ కొణొతె పూర్గుమ్ రెగ్డయ్లి రితి,

† "తుచి నావ్చి రిసా ఒండి మెద్దెనె అమ్క మార్తతి,

'కండ కత మెండల్ జేవ్' మెలి రితి అమ్క దెకితతి"

మెన రెగ్డ అస్సె. 37 జో అమ్క ప్రేమ కెర అమ్చి పాపుమ్ వయిలోసాచి సెక్తిక ఇన బాదల్ ఎత్కితె అమ్ పూర్తి జిన అస్సుమ్, జినుమ్దె.

38 అమ్క కిచ్చొ పూర్తి దయిరిమ్ మెలె, మొర్ను జవున్, జీవ్ తతిస్ జవున్, కేన్ లోకుమ్చ దూతల్ జవున్, బూతల్ జవున్, అప్పె జర్గు జతిసి జవున్, పడ్డొక జర్గు జతిసి జవున్, కేన్ లోకుమ్చ సెక్తివ్ జవున్, 39 ఈంజ లోకుమ్క ఉప్పిరి తిలిసి జవున్ ఎట్టొ తిలిసి జవున్,

† 8:36 8:36 కీర్తనలు 44:22.

జెర్మన్ జలిసి అన్నె కిచ్చో జలెకి, అమ్చో ప్రబు జలో క్రీస్తుయేను అమ్క దొర్కు కెర్లి దేముడుచి ప్రేమ తెంతో వీడుప కెరుక నెత్తె మెన అంక పూర్తి దయిరిమ్ అస్సె.

9

దేముడు పూర్ణమ్ నిసాన్ల యూదుల్

1-2 అంచి పెట్టి ఒగ్గర్ దుకుమ్ బాద కెద్దోడె తెదోడె తాఁ గెతయ్. నిజుమి, క్రీస్తుచో మాన్సు ఆవ్ సత్తిమ్ సంగితసి. జా దుకుమ్చి రిసా అంచి ఆత్మతె దేముడుచి సుద్ది తిలి ఆత్మ అంక సాచి జతయ్. 3 అంచి దుకుమ్ కిచ్చొక మెలె, జయ్యి సెకుమ్తె ఆవ్ జెర్మిలి రిసా జేవ్ అంచ సొంత మాన్సుల్ అంచ బావుడ్లు జవుల, చి జోవయింక 'యేసుక్రీస్తుక నంపజతు' మెన అంక కెద్ది ఆస మెలె, ఆవ్ క్రీస్తు తెంతో పిట్టవ జా నానెనుమ్తె గెలె జోచి రచ్చన జోవయింక దొర్కు జతి జలె, జోచి ఉప్పిర్చి అంచి ప్రేమక జోవయింతె తెంతో విడ్డల్ జతయ్. 4 జోవయించి రిసా కిచ్చొక అంక తెద్ది ఆస అస్సె మెలె, 'అంచయ్ మాన్సుల్ జా అంచయ్ బక్తి కెర్లు, అంచి గవురుమ్ దెకయ్తు' మెన దేముడు పూర్ణమ్ నిసాన్ *ఇస్రాయేలులు జోచ పుత్తర్పులు జతి జోచి †ఉజిడి, జోవయించి నెడిమి తతి వరుమ్ పూర్ణమ్ తెంతో దేముడు జోవయింక జోచి ‡ప్రమానుమ్ కోడు దిలన్, జోచ 4ఆగ్గుల్ దిలన్, జోచి *బక్తి కెర్తి ఆగ్గు దిలన్, †రచ్చించుప కెర్లొసా జెంక దిలిన్చి రిసాచ ప్రమాన్ దిలన్. 5 అబ్రాహామ్, ఇస్సాకు, యాకోబు జోవయించయ్ పూర్ణమ్చ. అన్నె, జో మాన్సు జలిన్చి జెర్మన్క దెకిలె, జోవయించి

* 9:4 9:4 'ఇస్రాయేలులు' మెలె, తొలితో యాకోబు పూర్ణమ్చొక ఎత్తి, అదికారుమ్ తిలొ దేముడు జా నాన్ తిలొ, ఆదికాండుమ్ 32:28. వడ్డొ జోవయించి సెకుమ్ మొత్తుమ్క 'ఇస్రాయేలులు' మెన నాన్ తిలన్. † 9:4 9:4 నిర్ణమకాండుమ్ 33:18-23. ‡ 9:4 9:4 అదికాండుమ్ 15:18, 17:1-21, 28:13, నిర్ణమకాండుమ్ 2:24, 6:2-8, 19:5, 34:10-27, సమాయేలు దొన్చి పుస్తకుమ్ 23:5. § 9:4 9:4 నిర్ణమకాండుమ్ 20:1-17, ద్వితియోపదేశ కాండుము 5:1-22, 10:1-5. * 9:4 9:4 నిర్ణమకాండుమ్ 25-31 అద్యయల్. † 9:4 9:4 యెసయా 53 అద్యయిమ్, యిర్మీయా 23:5-6.

సెకుమ్తె రచ్చించుప కెర్తొసా జలో క్రీస్తుయి జెర్మిలన్. †ఎత్కిచి ఉప్పిరి అదికారుమ్ తిలో దేముడుక జోబర! కెయక తెయక జోవయింక గవురుమ్ తవున్! ఆమేన్.

6 గని యూదుల్ ఒగ్గర్జిన్ అన్మానుమ్ జలిసి దెకిలె 'దేముడు పూర్ణుమ్ సంగిలి ప్రమానుమ్ కోడుక పిట్టి' మెన తుమ్ ఉచర నాయ్. పిట్టె నాయ్. కిచ్చొక ఇని మెంతసి మెలె, †ఇస్రాయేలుచి సెకుమ్తె జెర్మిలనతె సగుమ్జిన్క 'ఇస్రాయేలులు' మెనుక నెంజె, 7* అబ్రాహామ్చి సెకుమ్తె జెర్మిలన సగుమ్జిన్క 'జోవయించ బోదల్ జవుల' మెనుక నెంజె. అబ్రాహామ్చి పెట్టిచ సగుమ్జిన్ జోచ నిజుమ్చ బోదల్ నెంజిలిన్చి అర్దుమ్ కిచ్చొ మెలె, పూర్ణుమ్ దేముడు అబ్రాహామ్క,

†“తుచి సెకుమ్చ ఎత్కితె ఎక్కి ఇస్సాకుచి తెడి జెర్మిలనకయ్

'తుచయ్' మెన్నిందె”

మెన ప్రమానుమ్ సంగిలన్. 8 ఈంజ టాలిచి అర్దుమ్ కిచ్చొ మెలె, మాములుమ్ †ఆగ్ జెర్మిన్క జోచి సెకుమ్తె జెర్మిలన నాయ్, గని దేముడుచి †ప్రమానుమ్కయ్ జెర్మిలనక 'అబ్రాహామ్చి సెకుమ్చ' మెనుక జయెదె. 9 జా ప్రమానుమ్ సంగిలి పొది దేముడు అబ్రాహామ్క,

‡ 9:5 9:5 నెంజిలె, 'ఎత్కిచి ఉప్పిరి అదికారుమ్ తిలో దేముడు జొయ్యి. జోవయింక జెయ్యి!...'. § 9:6 9:6 మెలె 'యాకోబుచి'. * 9:7 9:7 యాకోబుక అబ్రాహామ్ మంత్రో అన్నొసి; అబ్బొన్చొ అబ్బొన్ జయెదె. † 9:7 9:7 అదికాండుమ్ 21:12. అబ్రాహామ్చి తేర్చి సారాక బోదల్ నెంజితికయ్, 'అంచి గొతిమాన్సు జలి హాగరు తెన్ అంచి నావ్ తెన్ బోద పాయి' మెన సారా సంగితికయ్, అబ్రాహామ్ దస్సి కెర్లన్, చి 'ఇష్టాయేల్' మెన పుత్తు పాయిలన్. అదికాండుమ్ 16 అద్యయిమ్. ‡ 9:8 9:8 తేర్చి సారాచి గొతిమాన్సు హాగరు తెన్ అబ్రాహామ్ పాయిలో పుత్తున్ ఇష్టాయేల్ ఆగుతె జెర్మిన్ జలోసా జయెదె. మాన్సుచి ఇష్టుమ్కయ్ పాయిలోసా జోచి రిసా మాములుమ్ అబ్రాహామ్చి సెకుమ్తె జెర్మిలనక ఇష్టాయేల్చి పెట్టి జెర్మిలన, ఇష్టాయేల్చి సెకుమ్చ టాలి జయెదె. § 9:8 9:8 ఇస్సాకు ఎత్కి అదికారుమ్ తిలో దేముడుచి ప్రమానుమ్కయ్ జెర్మిలోసాచి రిసా ఎత్కి అదికారుమ్ తిలో దేముడుచి ప్రమానుమ్ నంప కెర్లనక, మెలె యేసుక్రీస్తుక నంప కెర్లనకయ్ ఇస్సాకుచి పెట్టి జెర్మిలన ఇస్సాకుచి సెకుమ్చ టాలి జయెదె.

*“సంగిలి సమయుమ్ జా అయ్లి మెలె, ఆవ్ అన్నె జెయిందె,
చి సారాక పుత్తుది జెర్తెదె”
మెన ప్రమానుమ్ సంగిలన్.

10 జా ఏక్, అన్నె, అమ్చొ పూర్గుమ్చొ ఇస్సాకుచి తేర్ని రిబ్బా జో
ఎక్కి మున్నున్ తెన్ కల్వల్క అంగి జలి పొది, 11 జేవ్ కల్వల్ ఇన్నె నే
జెర్మితె అగ్గె, జోవయింతె కో సత్తిమ్ కో పాపుమ్ కెరుక నేతయ్ జలెకి,
‘కచ కమొచి రిసా నాయ్, గని కక్క నిసాన్ల అంచి ఇష్టుమ్ తయెదె గే,
జోవయింకయ్ నిసాన్’ మెన మాన్సుల్క నిసాన్ బుకార్తి జోచి ఇష్టుమ్
జెయిమ్ జంక మెనయ్, 12 రిబ్బాక దేముడు,

†“దకిలోచి సేవ వెల్లో కెరెదె”

మెన సంగిలన్. 13 అన్నె, అన్నెక్తె జో,
‡“దకిలో జలో యాకోబుక ప్రేమ కెర్లయ్,
గని వెల్లో జలో ఏసావుక విరోదుమ్ జలయ్”
మెన రెగ్గయ్లన్.

14 జలె, అమ్ కిచ్చొ మెనుక? ఎత్తి అదికారుమ్ తిలో దేముడు
కెర్లిన్క ‘నాయిమ్ నాయ్, సత్తిమ్ నాయ్’ మెనుక జయెదె గే? జయె
నాయ్. దస్సి మెనుక నాయ్. 15 కిచ్చొక మెలె, మోసేక జో,
§“కచి ఉప్పిరి దయ తియిదె గే, తియిదె.

కక్క కన్కారుమ్ దెకిన్దె గే, దెకిన్దె”

మెన సంగిలన్. 16 కేన్ మాన్సుచి ఇష్టుమ్తె నాయ్, కేన్ మాన్సుచ
కమొతె నాయ్, గని దేముడుచి దయతె. 17 అన్నె, దేముడుచ కొడొతె
రెగిడ్లి రితి, పడ్డొ ఇస్రాయేలుల్క అల్లర్ కెర్తె తిలో ఐగుప్తు దేసిమ్చొ రాడ్
జీవ్ తిలో పరో రానొక దేముడు,

*“ఒండి లోకుమ్తె అంచి నావ్ సాడుప జవున్ మెన,
తుచితె జర్గు జతి కామ్తె అంచి సెక్తి దెకయ్తి రిసాయి
తుక ఆవ్ టీవడ అస్సి”

* 9:9 9:9 ఆదికాండుమ్ 17:19-21, 18:10, 14. † 9:12 9:12 ఆదికాండుమ్
25:23. ‡ 9:13 9:13 మలాకి 1:2-3. § 9:15 9:15 నిర్గమకాండుమ్ 33:19.

* 9:17 9:17 నిర్గమకాండుమ్ 9:13-16.

మెన సంగ తెద్రయ్‌లన్. 18 కచి ఉప్పిరి జోచి దయ తియెదె గే, జోచి ఇస్టుమ్. కచి జీవ్ రాడ్ కెరెదె గే, జోచి ఇస్టుమ్!

19 దస్సి సంగిలె, “దస్సి జలె, దేముడుచి ఇస్టుమ్‌క జో కెర్తిసి జోచి పూచి. జాకయ్, జో కిసి కక్క పాపుమ్ వయడుక జయెదె! అమ్ రచ్చించుప జంక జోచి సెలవ్ నెంజిలె, కిసి అమ్చి పూచి జయెదె! జా పాపుమ్ వయక కిసి అమ్చి పూచి జయెదె!” మెంతె, 20 గని, ఓ మాన్సు, తుయి కొన్సో, చి దేముడుచి కోడుక జబాబ్ అన్నె దెతె! మత్తిక తెయార్ కెర్లి గేడి జాక తెయార్ కెర్లి కుమ్మరొక † “కిచ్చొక ఈంజయి రూపుమ్ అంక దిలది?”

మెన పునెదె గే? 21 నాయ్. జా మత్తిచి ఉప్పిరి కుమ్మరొక పూర్తి అదికారుమ్. జయ్యి మత్తిబెండక సూటిచి గవురుమ్చి కెరెదె గే, గవురుమ్ నెంజిలి కామ్చి రిసాచి కెరెదె గే, జోచి ఇస్టుమ్. 22-23 జలె, పాపుమ్చి ఉప్పిర్చి జోవయించి కోపుమ్ దెకవుక మెన, జోచి సెక్తిచి రుజ్జు దెకవుక మెన దేముడుక ఇస్టుమ్ జలెకి, జోచి పరలోకుమ్చి ఉజిడితె, గవురుమ్తె పణ్డొక బెదవనుక మెన జో అగ్గె తెంతో నిసాన్ల గేడివొక జో కెర్లి ఎదివాట్ దయ జాన్తి ఎదక జోవయించి సిచ్చ జత నాసెనుమ్తె గెత, గేడివొ ఒండి పాపుమ్ జో మదెనె ఒగ్గర్ సేంపు ఓర్నువ జా రకితె తిలె, జోచి దయ! 24 జో ఎదివాట్ దయ కెర్ల నిసాన్ల గేడివొ కొన్స మెలె, ఆము. ఆమ్ కొన్స మెలె, యూదుల్ తెంతో ఆమ్ సగుమ్జిన్క జో బుకారా అస్సె, గని యూదుల్ నెంజిలన తెంతో కి అన్నె మాన్సుల్క బుకారా అస్సె. 25 జోచ కబుర్లు పూర్లుమ్ సంగితె తిలొ హోసెయ అత్తి దేముడుచ కొణ్డొక రెగిడ్లి రితి,

‡ “అంచయ్ మాన్సుల్’ మెన ఆవ్ అగ్గె నే సంగిలసక

తెదొడ్క ‘అంచయ్’ మెనిందె.

ఆవ్ అగ్గె ప్రేమ నెంజిలిన్క ‘ఆవ్ ప్రేమ కెర్లిసి’

మెనిందె.”

† 9:20 9:20 యెసయా 29:16, 45:9. ‡ 9:25 9:25 హోసెయ 2:23.

26 §“అన్నె, ‘తూమ్ అంచ మాన్సుల్ నెంజుసు’ మెన అగ్గె జో సంగిలి ట్రాన్తె తెదొడ్క ‘జీవ్ తిలో, జీవ్ దెతో దేముడుచ పుత్తర్లు జేవ్’ మెన మాన్సుల్ సంగుల.”

27 అన్నె, ఇస్రాయేలులు మెల అమ్చ యూదుల్చి రిసా దేముడుచ కబుర్లు సంగితె తిలో యెసయా పూర్గుమ్చొ కిచ్చొ సాడుప కెర్లి రితి జలన్ మెలె,

*“సముద్రుమ్చి ఒడ్డుచి ఇస్కుచ గిడ్డల్ కెత్తి జవుల గే, ఇస్రాయేలుచ పుత్తర్లు జల యూదుల్ దస్సి ఎత్తివాట్ జిన్ జవుల, గని జోవయింతె సేంసెల రిత ఎక్కి దొన్ని రిత రచ్చించువ జవుల.

28 కిచ్చొక మెలె, ఈంజ లోకుమ్చ మాన్సుల్చి ఉప్పిరి కిచ్చొ సిచ్చచి తీర్పు ప్రబు ఉచరెదె గే, సత్త తేన్ తంద్రతేన్ జో జర్లు కెరెదె.” మెన రెగ్గ అస్సె.

29 అన్నె జా నే జతె అగ్గె తెంతో జో యెసయాచి అత్తి జో దేముడు ప్రబు రెగ్గయేలి రితి జర్లు జా అస్సె. కిచ్చొ మెన మెలె,

†“అమ్క సిచ్చ నే జత బోదల్ సగుమ్జిన్ సేస్తి రితి పరలోకుమ్చ ఎత్తి అదికారుమ్ తిలో దేముడు ప్రబు సెలవ్ దెతో నాయ్ జలె,

‡సాదొమ అన్నె గొమొరా పట్నల్చి రితి సిచ్చ జా కుడ్తె నాసెనుమ్ జతమ్” మెన రెగిడ్డి కోడు.

30 జలె, కిచ్చొ మెనుమ? ఈంజయి. సత్తిమ్ వాట్ నే చజిల యూదుల్ నెంజిలస దేముడు దెతి పున్నిమ్ జా అస్తి. కీసి మెలె, నముకుమ్ వాట్. యెసుక్రిస్తుక నంపజలి వాటు. 31 గని ఆగ్గుల్ వాట్ పున్నిమ్ జంక ఉచర్ల అమ్చ ఇస్రాయేలుల్ మెల యూదుల్ ఆగ్గుల్చ కమ్మొవాట్ పున్నిమ్ ఇండుక నెత్త ఆగ్గుల్ తిలిసి నెరవెర్చువ నే కెర,

§ 9:26 9:26 హోసెయ 1:10. * 9:27 9:27 యెసయా 10:22, 23. † 9:29 9:29 యెసయా 1:9. ‡ 9:29 9:29 ఆదికాండుమ్ 13:13, 18:20, 19:24-25.

ఓడుప జల. 32 నముకుమ్ వాట్ నాయ్ గని కమొ వాటీ రచ్చున దొర్కు కెరనుక ఉచర్ల. వట్టెచొ పత్రె పిస్త సేడ్ల రిత జాఁ ఓడుప జా అస్తి. 33 వట్టెచొ పత్తురు మెలె, యేసుక్రీస్తు. యేసుక్రీస్తుచి ఉప్పిరి నంపజతిసి నే జతిన్చి రిసా అన్నెక్ కోడుతె తిలి రితి. కేన్ కోడు మెలె, §“ఈందె, ‘సీయోను’ మెల అమ్చ యూదుల్చి వట్టె ఏక్ పత్తురు ఆవ్ గల్లసి.

జేవ్ నంప నెంజ జో పత్రె, జో సాప్రయ్ పిసిర సేడుల. గని జోచి ఉప్పిరి కో జో నముకుమ్ తివుల గే, జెవ్వి కచితుమ్ లాజ్ జతి నాయ్, ఓడుప జతి నాయ్” మెన రెగ్గ అస్సె.

10

యేసుక్రీస్తుకయ్ నంపజలెకయ్ రచ్చించుప జంక జతిన్

1 బావుడ్లు, నంపనెంజిల అమ్చ యూదుల్చి రిసా “జేవ్ కి నంపజా రచ్చించుప జతు” మెన అంక జీవు డడ్ల దేముడుక ఆవ్ ప్రార్దన కెరె తత్తసి. 2 నిజుమి దేముడుచి సేవ కెరుక యూదుల్ ఆస తెన్ అస్తి మెన ఆవ్ సాచి జతసి, గని జో దెతి రచ్చున కిసిచి గే అర్దుమ్ నే కెరన పొరపాట్ జా గెచ్చు అస్తి. 3 మెలె, దేముడు దెతి పున్నిమ్ కేన్ వాటు దొర్కు జతయ్ గే, అర్దుమ్ నే కెరంతె జోవయించి సొంత సెక్కిక పున్నిమ్ జంక ఉచర. దేముడు పున్నిమ్ దెతి వరుమ్ నజన్తి రితి దాక్ కెరంతి నాయ్. 4 మెలె, ఎక్కి క్రీస్తుచి, తెడి ఆగ్గుల్ సికడ్డి పున్నిమ్ దొర్కు జతయ్, ఆగ్గుల్తె కోర్ప జా జలిసి కుట్టయ్తోసా నెరవెర్పుప కెర్తొసా జొయ్యి, చి జోచి ఉప్పిరి కో జోవయించి నముకుమ్ తివుల గే, జోవయించి పాపుమ్ జో పుంచెదె.

5 మోసేచి అత్తి రెగిడ్లిసి ఏక్ కిచ్చొ అస్సె మెలె, *“ఆగ్గుల్తెచి పున్నిమ్ కో పూర్తి నిదానుమ్ ఇండుల గే, జేవ్చి తెన్ జివుల”

§ 9:33 9:33 యెనయా 8:14, 28:16, యోవేలు 2:32. లేవీయకాండుమ్ 18:5.

* 10:5 10:5

మెన రెగ్గ అస్సె. 6 † గని నముకుమ్ వాట్ పున్నిమ్ జతిన్చి రిసాచి ఏక్ కోడు ఉచరుమ. “పరలోకుమ్తె కో వెగ గెచ్చుల? ‘క్రిస్తుక ఉత్రవ కడ ఆన్తి రిసా’ మెనుమ.” 7 నెంజిలె, “బూలోకుమ్క ఎట్టో లోకుమ్తె కో ఉత్ర గెచ్చుల?”; ‘క్రిస్తుక మొర్ను తెంతో వెగవ కడ ఆనుక’ మెనుమ. నాయ్, దస్సి మెన నాయ్. 8 నముకుమ్ వాట్ చి రచ్చనచి కోడు కేనె గెతిసి నెంజె, కిచ్చో కామ్ కెర్తిసి నెంజె. రచ్చన దూరి నాయ్. రచ్చనచి కోడు పాసి అస్సె. తుమ్చి చోడితె, తుమ్చి పెట్టి అస్సె. మెలె, క్రిస్తుచి ఉప్పిర్చి నముకుమ్చి రిసా అమ్ సుబుమ్ కబుర్ బోదన కెర్తనుమ్. జయ్యి కోడు. 9 మెలె, యేసుక ‘పరలోకుమ్చొ ప్రబు జొయ్యి’ మెన మాన్సుచి మొక్కె కో సంగ ఒప్పన, ‘మొర్ను తెంతో దేముడు అబ్బొసి జోక విడ్డల్ కెర అన్నె జియడ్లన్’ మెన పెట్టి నిదానుమ్ నంపజవుల గే, జెవ్వి రచ్చించుప జవుల. 10 కిచ్చొక మెలె, ‡మాన్సు జోచి పెట్టి నంపజలె, జోచి పాపుమ్ పుంచి జయెదె. జోచి చోడి ఒప్పన్లె, జో రచ్చించుప జయెదె.

11 దేముడుచ కొణ్ణె రెగ్గయ్లిన్ ఉప్పిరి ఏక్ దెకిలమ్. కిచ్చొ మెలె, § “జోచి ఉప్పిరి జోచి నముకుమ్ తిలో కేన్ మాన్సుకి కచితుమ్ లాజ్ జతి నాయ్ ఓడుప జతి నాయ్” మెన రెగ్గ అస్సె. 12 కొన్న మెలె, యూదుల్క గ్రీసు దేసిమ్చ సుదల్క కక్కయ్ దేముడు తేడ దెకె నాయ్. జొయ్యి ప్రబు ఎత్కికయ్ ప్రబు, చి జోక నంపజా, జో దెతి రచ్చన నజితో ఎత్కి మాన్సుక జోచి వరుమ్ జో దెయెదె. 13 దేముడుచి కొణ్ణె రెగ్గయ్లి రితి;
* “ప్రబుచి రచ్చన నజన్తో ఎత్కి మాన్సు తుచితెయి రచ్చన అస్సె మెన ఒప్పన రచ్చించుప జయెదె” మెన అస్సె.

† 10:6 10:6 6-7 ద్విత్వీయోపదేశ కాండుము 30:12-14చి కోడు పవులు ఇన్నె బెదయ్తయ్. ‡ 10:10 10:10 నెంజిలె, మాన్సు జోవయింది పెట్టి నంపజా జోవయింది చోడి ఒప్పన్లె, జోవయింది పాపుమ్ పుంచి జయెదె, జో రచ్చించుప జయెదె. § 10:11 10:11 యోవేలు 2:32, రోమియుల్ 9:33. * 10:13 10:13 యోవేలు 2:32.

సుబుమ్ కబుర్ సూనయ్తి పూచిచి రిసాచి కోడు

14 జలె, మాన్సుల్ క్రీస్తుక నంప నే జలె, జోవయించి రచ్చన కీసి నజుల! జోచి రిసా నే సూన తిలె, జోక కీసి నంపజవుల! కో బోదన కెరుక నే గెలె, కీసి జోచి రిసా సూనుల! 15 అన్నె దేముడు నే తెద్రయెలె, మాన్సుల్ కీసి జోచి బోదన కెరుల! దేముడుచి కొడెతె రెగ్గయెలి రితి;

+“సుబుమ్ కబుర్ కో బోదన కెరుల గే, జోవయించ చట్టొ కెద్ది సూటి!”

మెన అస్సె. 16 గని సూన్ల అమ్చ ఇస్రాయేలుల్ ఎత్కిజిన్ నంపజా అస్తి మెన ఉచర నాయ్. యెసయాచి అత్తి దేముడు అన్నె రెగ్గయెలి రితి;

*“ప్రబు, అమ్ సూనయ్లిసి కో నంపజా అస్తి?”

మెన రెగిడ్డి కోడు.

17 జలె, కొడె సూనయ్లెకయ్ మాన్సుల్ నంపజవుల. జేవ్ కిచ్చొ సూనుక మెలె, క్రీస్తుచి రిసాచి సుబుమ్ కబుర్ సూనవ బోదన కెర్రిసి.

యూదుల్ ఒగ్గర్జిన్ సూనుక నెసిలిన్

18 జలె, అమ్చ యూదుల్క ‘సుబుమ్ కబుర్ సూన తతి నాయ్ గే?’ మెన ఆవ్ పుసితసి. సూనయ్ అస్తి. జా ఒండి లోకుమ్తె సూనయ్ జలిన్చి రిసా దేముడుచి కొడెతె రెగ్గయెలి ఏక్ కోడు బెదితయ్.

§“జోవయించి అవాడ్ ఒండి లోకుమ్తె సూనయి జా అస్సె,

ఎత్కి దిక్కుతె కెద్ది దూరి జలెకి,

జోవయించ కొడె సూనయ్ జా అస్తి”

మెన రెగ్గ అస్సె. 19 జలె, ఆవ్ అన్నె పుసితసి; ‘ఇస్రాయేలు పైజల్ అర్దుమ్ కెరంతి నాయ్ గే?’ మెన పుసితసి జలె, మోసేచి అత్తి దేముడు,

*“అంచ యూదుల్ నెంజిలనక తుమ్ యూదుల్ గోస జతి రితి కెరిందె,

† 10:15 10:15 యెసయా 52:7. ‡ 10:16 10:16 యెసయా 53:1. § 10:18

10:18 కిర్తనలు 19:4. * 10:19 10:19 ద్విత్వియాపదేశ కాండుము 32.21.

బుద్ధి నెంజిలి దేసిమ్చచి ఉప్పిరి తుమ్క కోపుమ్ జెతి రితి ఏక్ కామ్
జర్గు కెరిందె”

మెన యూదుల్ నెంజిలన నంపజలిన్చి రిసా యూదుల్ గోస జతిన్చి
రిసా రెగిడ్లి కోడు. ²⁰ పడ్డో, యూదుల్ నెంజిలన క్రీస్తుక నంపజా
దేముడు తెన్ బెదితిన్చి రిసా అన్నె సొస్టుమ్చి కోడు దేముడు
యెసయాచి అత్తి రెగ్డ అస్సె.

†“అంక చజుక నే ఉచర్లన, అంక చజ అస్తి.

అంచి రిసా నే పుసిలనక, ఆవ్ డీస అస్సి”

మెన రెగిడ్లి కోడు. ²¹ గని అమ్చ ఇస్రాయేలుల్చి రిసా జోచి అత్తి కిచ్చొ
రెగ్డ అస్సె మెలె,

‡“కోడు నే సూన్త ఇస్టుమ్ అయ్లి రితి బుల్ల ప్రెజల్క

ఒండి మెద్దెనె అత్తో చంపొ కెర బుకార్తె తిలయ్,

గని ఆవ్ దెతి వరుమ్ నెసిల”

మెన రెగ్డ అస్సె.

11

యూదుల్క దేముడు పూర్తి నే ములిలిన్

¹ అప్పె కిచ్చొ పుసితసి? జోవయించ యూదుల్క దేముడు పూర్తి
ముల అస్సె గే? నాయ్! ఆవ్ సొంత కి ఇస్రాయేలుడు, అబ్రాహామ్చి
సెకుమ్తె జెర్మిలోసా, బెన్యామీను చి తెగతె జెర్మిలోసా. ² జో దెతి
రచ్చన తంక మెన జో అగ్గె తెంతో జాన్ల నిసాన మాన్సుల్క దేముడు
ములె నాయ్. జా పొదిచ ఇస్రాయేలుల్చి రిసా కిచ్చొ మెన దేముడుచి
మొక్కె వీలీయా పూర్గుమ్చొ ఏడ తీర్పు సంగిలన్ గే దేముడుచి కొడెతె
అస్సె.

³*“ప్రబు, తుచ కబుర్లు సంగితనక మార అస్తి.

తుచి నావ్ తెన్ బందిల గుడివో బొసుడవ అస్తి.

అప్పె ఆవ్ ఎక్కిలోయి తుచ కబుర్లు సంగితోసా అస్సి,

† 10:20 10:20 యెసయా 65:1. ‡ 10:21 10:21 యెసయా 65:2. * 11:3
11:3 రాసల్ మొదోల్ పుస్తకుమ్ 19:10, 14.

చి అంక కి మారుక కోర్ప జతతి”
మెన ఏలీయా ఏడ్లన్. 4 గని దేముడు జోక

† “బయలు దేముడు’ మెలోసాక నే జోకరై అంకయ్ నిదానుమ్ తత్తు
మెన సత్తు వెయిల్జిన్ యూదుల్ జా పాపుమ్తె నే సేడ్డి రితి
పిట్టవ అస్సె”

మెన సంగిలన్. 5 అప్పె కి దేముడుచి దయక జో నిసాన సేంసెల
యూదుల్ అస్తి. 6 గని జోవయించి రచ్చన కమ్మెవాట్ నాయ్, గని
జోచి దయ వాటు జోవయింక దొర్కు జా అస్సె. కమ్మెవాట్ నాయ్,
నెంజిలె దయ మెన సంగితిక, దయ జయె నాయ్.

7 జలె, కిచ్చో రుజ్జు డిస్తయ్ మెలె, జేవ్ చజుక ఉచర్లిసి అమ్చ
ఇస్రాయేలుల్క పిట్ట అస్సె. జోవయింతె కక్క దేముడు నిసాన్లన్ గే,
జోవయింక దొర్కు జా అస్సె, గని తిలనక జోవయించి జీవ్ రాడ్ జా
గెచ్చు, జా రచ్చన జేవ్ నజనుక నాయ్. 8 దేముడుచి కొణెతె రెగ్డయ్లి
రితి;

† “అప్పె ఎద కి ‘దెకుత్ నాయ్, సూన్తు నాయ్’ మెనయ్,
జేవ్ గుడ్డి బొయ్ రొ తతి రితి, జుమితన తతి రితి,
దేముడు జర్గు కెర అస్సె”

మెన రెగిడ్డి కోడు. 9 పడ్డె, దావీదు పూర్గుమ్చొచి అత్తి రెగిడ్డి రితి కి;
‡ “జోవయించి విందు అన్నిమ్ జోవయింక బోను జలి రితి జా,
జోవయింక దెర్ను సేడవ్ను, సిచ్చ అన్సు.

10 జేవ్ గుడ్డి జా దెకుత్ నాయ్, చి
జోవయించి పాటి కుబ్బి జలి రితి జా,
జోవయించి పాపుమ్చి జాడు కెయెక తెయెక వయుతు”
మెన రెగిడ్డి కోడు.

11 జలె, జేవ్ ఇస్రాయేలుల్ పిసిర్లిసి జలె, ‘పూర్తి సేడయ్ గెతు’
మెలి ఉద్దెనుమ్కయ్ దేముడు జర్గు కెర్లన్ గే? మెన ఆవ్ పునీతసి.
నాయ్! గని జేవ్ ఇస్రాయేలుల్ నంప నెంజి పొరపాట్ జతికయ్,

† 11:4 11:4 రాసల్ మొవోల్ పుస్తకుమ్ 19:18. ‡ 11:8 11:8 ద్వితియోపదేశ
కాండుము 29:4, యెనయా 29:10. § 11:9 11:9 కీర్తనలు 69:22, 23.

రచ్చన దొర్కు జతి వాటు యూదుల్ నెంజిలనక దొర్కు జా అస్సె. 'జేవ్ యూదుల్ నెంజిలన రచ్చించుప జతిసి అమ్చ ఇస్రాయేలుల్ దెక గోస జా బుద్ది ఉచరంతు' మెనయ్ దేముడు దస్సి జర్గు కెర అస్సె. ¹² జలె, జేవ్ ఇస్రాయేలుల్ పొరపాట్ జలిసి ఒండి లోకుమ్చక దేముడు దెతి సొమ్సారుమ్ దొర్కు కెర అస్సె జలె, జేవ్ ఇస్రాయేలుల్ ఓడుప జలిసి యూదుల్ నెంజిలనక సొమ్సారుమ్ కెర అస్సె జలె, జేవ్ యూదుల్ జల ఇస్రాయేలుల్ ఎత్కిజిన్ వడ్డొక రచ్చించుప జలె, లోకుమ్క అన్నె కెద్ది సొమ్సారుమ్ జయెదె!

¹³ అప్పె, జలె, ఒత్త తిల తుమ్ యూదుల్ నెంజిలనక, జలె, ఆవ్ కిచ్చొ సంగితసి మెలె, తుమ్కయ్ సుబుమ్ కబుర్ నూనవుక మెన ప్రబు అంక జోచొ బారికి కెర తెద్దవ అస్సె. ఈంజ కామ్చి రిసా ఆవ్ ఒగ్గర్ సర్ద జతసి. ¹⁴ తూమ్ రచ్చించుప జతిసి అమ్చ యూదుల్ దెకిలె, ఇదిల్ జవుస్ గోస జా, జోవయింతె సగుమ్జిన్ ప్రబుచి రిసాచి సుబుమ్ కబుర్క ఇస్టుమ్ జవుల, చి జో దొర్కు కెర్తి రచ్చన నజనుల. దస్సి జలె, జేవ్ కి రచ్చించుప జతి కామ్తె ఆవ్ ఇదిల్ బెద తయిందె. ¹⁵ ఈంజ కిచ్చొక అంచి ఆస మెలె, దేముడు అమ్చ యూదుల్క గడియ ములయ్లి రిసా, ఒండి లోకుమ్చ అన్నె మాస్సుల్ కి జోవయింతెన్ బెదుక వాటు అయ్లి. దస్సి కి దేముడు అమ్చ యూదుల్కయ్ అన్నె బెదవన్లె, మొర్ను తెంతొ పిట్టవ జా జేవ్ కి నొవర్ జవుల.

రూక్తె కొమ్మల్ అంటుప కెర్తిన్

¹⁶ 'నొవొ' మెన తొలితొ బలి దిలి పాకుమ్ దేముడుక దిలి రిసా సుద్ది జా అస్సె జలె, జా ఒండి పాకుమ్ సుద్ది జలి రితి జతయ్. అన్నె, రూక్చి చేరు సుద్ది జలె, కొమ్మల్ కి సుద్ది జవుల. ¹⁷ జలె, దేముడు నిసాన్ల ఇస్రాయేలుల్క 'ఒలీవ రూకు' మెనుమ. తుమ్ యూదుల్ నెంజిలనక 'వెర్రి ఒలీవ రూక్చ కొమ్మల్' మెనుమ. జలె, జో చెంగిలో ఒలీవ చెట్టెచ కొమ్మల్ సగుమ్ కండి జా సేడ అస్తి మెనుమ, అన్నె జా రూక్చ కొమ్మల్ గెలిన్తె తూమ్ యూదుల్ నెంజిల జా వెర్రి ఒలీవ

రూక్చ కొమ్మల్ అంటుప జలదు, జో చెంగిలో రూక్చి చేరు దెతి సెక్తితె బెద తుమ్ చెంగిల్ జతి రిసాయి, జేవ్చి జివుక తుమ్ జతి రిసాయి. 18 దస్సికయ్, 'జో చెంగిలో రూక్చ కొమ్మల్ జలమ్ ఆము' మెన తుమ్ గవురుమ్ ఉచరన నాయ్. గవురుమ్ ఉచరనుక దెర్లె, తుమ్ కిచ్చొ ఉచార కెర మెలె, తుమ్చి సెక్తిక చేరు జియె నాయ్, గని చేరుచి సెక్తికయ్ తుమ్ జియె అస్సున్.

19 తూమ్ కిచ్చొ ఉచర్తె మెలె, "ఆము అంటుప జతి రిసాయి ఎజ్జోమాని కొమ్మల్ సేడయ్లన్". 20 జా కోడు కి నిజామ్, గని జేవ్ జోవయించి అన్మానుమ్చి రిసా సేడయ్ జల. గని తుమ్ నముకుమ్ వాటు అంచుప జా టీవ్తిసి. జేవ్చ ఉప్పిర్ తుమ్చి రిసా తుమ్ గవురుమ్ ఉచరన నాయ్, గని దేముడుచి దయక తుమ్ బియె. 21 కిచ్చొక మెలె, జో రూక్చ సొంత కొమ్మల్ అన్మానుమ్ జలిన్క జో జోవయింక సిచ్చుతె గలిలన్ మెలె, తూమ్ దస్సి అన్మానుమ్ జలె, తుమ్క కి కండ వెంట గెలెదె.

22 దేముడుచి దయచి రిసా కి, జో దెతి సిచ్చుచి సెక్తిచి రిసా కి, తుమ్ చెంగిల్ ఉచర. పొరపాట్ జా సెడ్లసక జేవ్ విలువ జలి సిచ్చ జో దెయెదె, గని జోచి దయచి తెడి తుమ్ తా నముకుమ్ వాట్ ఇండితె తిలె, జోవయించి దయ తుమ్చి ఉప్పిరి తయెదె. తుమ్ జా నముకుమ్ వాట్ నే ఇండిలె, తుమ్క కి కండ వెంట గెలెదె.

23 జేవ్ కి, జోవయించి అన్మానుమ్ ములిలె, జా రూక్తె అన్నె అంటుప జవుల. కిచ్చొక మెలె, జోవయింక అన్నె అంటుప కెర్తి సెక్తి దేముడుచి అత్తి అస్సు. 24 తూమ్ జలె, వెర్రి ఒలీవ రూక్చ కొమ్మల్ కండి జా తుమ్ మాములుమ్ నే బెద్దితో తోట ఒలీవ రూక్తె అంటుప జా అస్సున్ జలె, అన్నె సొంత జెర్మున్క తోట రూక్తె తా కండి జా తిల కొమ్మల్క జో ఒత్త అన్నె అంటుప కెరుక జయెదె!

25 తుమ్ సొంత గవురుమ్ నే ఉచరంతి రిసా, జో దేముడు బార్ కెర్లి ఈంజ గుట్టు సరిగా అర్దుమ్ కెరన, బావుడ్లు. కిచ్చొ మెలె, 'నంపజంక' మెన జో కెత్తిజిన్ యూదుల్ నెంజిలసక నిసాన్ల గే, జేవ్ ఎత్తిజిన్ ప్రబుతె జెతె ఎదక, ఏక వెల్లి వాట ఇస్రాయేలుల్ రాడ్ జివ్ జా అస్తి.

26 గని యూదుల్ నెంజిలసతె కక్క కక్క జో నిసాన అస్సె గే, జేవ్ ఎత్కిజిన్ నంపజల మెలె, ఇస్రాయేలుల్ ఎత్కిజిన్ రచ్చించుప జవుల. దేముడుచి కొడొతె,

*“†సీయోనుతె రచ్చించుప కెర్తొసొ జెర్పెదె.

‘యాకోబు’ మెన నావ్ తిల అమ్చ యూదుల్ తెంతో
పాపుమ్బుద్ది జో ఉదడెదె”

అన్సె,

27 ‡“జోవయించి పాపల్ ఆవ్ కెయక గెచ్చవ గెలిందె గే,

తెదొడక అంచి ఈంజ నే పిట్టి ప్రమానుమ్ కోడు నెరవెర్పువ జయెదె”
మెన రెగ్గ అస్సె.

28 తుమ్కయ్ ‘నంపజా రచ్చించుప జతు’ మెన, అప్పెచి మట్టుక సుబుమ్ కబుర్చి రిసొ దేముడుక జేవ్ యూదుల్ విరోదుమ్ సుదల్ జా అస్తి. గని జో జోవయింక నిసాన దెకిలె, జోవయింక పూర్గుల్క జో సంగిలి ప్రమానుమ్ కోడుచి రిసొ, జో జోవయింక ప్రేమయ్ అస్సె.

29 కిచ్చొక మెలె, దేముడు దెతి వరుమ్, జో కక్క కక్క నిసాన బుకార్లిసి, జో మార్పువ కెరె నాయ్. జో దసొచొ నెంజె.

30 తుమ్ అగ్గె దేముడుచ కొడొ నే సూన్తె పాపుమ్ తెన్ తిలదు, గని జేవ్ యూదుల్ జోచి కోడు ములిలి రిసొ, జో తుమ్చి ఉప్పిరి దయ తియ తుమ్చి పాపుమ్ పుంచ అస్సె. 31 దస్సి జేవ్ అప్పె జోచి కోడు నే సూన్తె పాపుమ్ తెన్ అస్తి. కిచ్చొక మెలె, తుమ్క జో దేముడు రచ్చించుప కెర్లి వాట్కయ్ జేవ్ కి రచ్చించుప జతి రిసొయి.

32 యూదుడు జలెకి, యూదుడు నెంజిలె కి, ఎత్కి మాన్సుక జోచి దయ దెకవుక మెనయ్, ఎత్కిజిన్ ఎక్కి రితి జోచి కోడు నే సూన్లి పాపుమ్తె దెర్ను నేడుక మెనయ్ జో సెలవ్ దా అస్సె.

దేముడుచి గవురుమ్

* 11:26 11:26 యెసయా 59:20, 21. † 11:26 11:26 ‘సీయోనుతె’ మెలె, యూదుల్తె, ఇస్రాయేలుల్తె. ‡ 11:27 11:27 యిర్మీయా 31:34, యెసయా 27:9.

33 దేముడుచి దయచి సొమ్నారుమ్, జోచి బుద్ధి, జోచి గ్యానుమ్ కెద్ది తమ్మునచి! జోచ తీర్పుల్ కెద్ది తెల్వచ! కెద్ది తెలివి మెలె, అమ్ మాన్సుల్ కోయి అర్దుమ్ కెరనుక నెత్తుమ్, మెనుక నెత్తుమ్! జోచ కమొ అమ్ కోయి పరిచ్చ కెరుక నెత్తుమ్! 34 దేముడుచి కొడతె,

§“ప్రబుచి పెట్టి తిలిసి కో కెయ జాన అస్తి?
జోక కో బుద్ధి సంగుక జయెదె? కోయి నాయ్”
మెన అన్నె,

35 * “జో రునుమ్ జతి రితి కో కెయ జోక కిచ్చొ దా అస్తి?

కోయి నాయ్, కెయ నాయ్, కిచ్చొయ్ నాయ్”

మెన రెగ్గ అస్సె. 36 కిచ్చొక మెలె, ఎత్తి జోతె తెంతో జెతయ్, జో జెర్మయ్లో. ఎత్తి జోచి తెడి అస్సె, చి జోచి గవురుమ్ దెకయ్తి రిసాయి అస్సె. కెయఁక తెయఁక జోవయింక జోబర! ఆమేన్.

12

ప్రబుచి ఆత్మనెక్కిక జియ

1 దేముడు దెతి రచ్చన జోచి దయకయ్ తుమ్క దొర్కు జలి రిసా, బావుడ్లు, అవ్ బతిమాల్పా జా తుమ్క కిచ్చొ సంగితసి మెలె, జేవ్ జోచయ్ తతి రితి, దేముడుక సర్ల కెర్తి రితి, జోక తుమ్చ ఆగ్ జివ్ తిలి బలి దిలి రితి తుమ్ బుద్ధి ఇండ. ఈంజ సేవ తుమ్క సరి జలిసి.

2 ‘ఎత్తిజిన్ ఇన దస కమొ కెర్తతి, అమ్ కి కెరుమ’ మెలి రితి ఈంజ కాలుమ్చ కమొ రితి తుమ్ ఇండ నాయ్. తుమ్చి ఆత్మతె నొవ మాన్సుల్ జా, చి ప్రబుచి ఇస్టుమ్ కిచ్చొ కిచ్చొ గే పూర్తి అజ్జ జస్తె. జోచి ఇస్టుమ్ కిచ్చొ మెలె, చెంగిల్ తిలిసి ఎత్తి, జోక సర్ల కెర్తిసి ఎత్తి, కిచ్చొ పొరపాట్ నెంజిలిన్ ఎత్తి మెన పూర్తి తుమ్ అజ్జ జస్తె.

3 మెలె, దేముడు అంక దిలి దయ తెన్ తుమ్క ఆవ్ కిచ్చొ బతిమాల్పా జా సంగితసి మెలె, తుమ్ కో గవురుమ్ ఉచరన

§ 11:34 11:34 యెసయా 40:13, యిర్మీయా 23:18. * 11:35 11:35 యోబు 41:11.

నాయ్, గని తుమ్ ఎత్కి మాన్సు జాగర్త తెన్ సరిగా పరిచ్చ కెరన, నముకుమ్చి రిసా దేముడు కక్క కిచ్చొ సెక్తివరుమ్ దా అస్సె గే, తుమ్చితె ఎత్కి మాన్సు చినన, తుమ్క దిలి సెక్తి వాడిక కెర. ⁴ మెలె, ఎక్కి ఆగ్తె ఒగ్గర్ వాటల్ తవుల, అన్నె ఎత్కి వాటల్క ఎక్కి రితి కామ్ తయె నాయ్, గని ఏక్ వాటక ఏక్ కామ్, అన్నెక్ వాటక అన్నెక్ కామ్ తయెదె. ⁵ దస్సి, అమ్ ఒగ్గర్జిన్ జలెకి, క్రిస్తుచి తెడి ఎక్కి ఆగ్ జా అస్సుమ్, చి ఎక్కిలోక ఎక్కిలో అమ్ తోడు తంక అమ్చి పూచి, ⁶ జాకయ్, అమ్చితె కక్క ప్రబు కిచ్చొ సెక్తివరుమ్ దా అస్సె గే, అమ్ ఎత్కి మాన్సు బుద్ది తెన్ జా సెక్తి వాడిక కెరుక. ప్రబుచ కబుర్లు సంగితి సెక్తి తిలోసా జలె, ప్రబు దిలి నముకుమ్ తెన్ సంగున్. ⁷ ప్రబు దిలి కిచ్చొ సేవ కెర్తొసా జలె, జా సేవ కెర్సు. ప్రబుచి బోదన కెర్తి సెక్తి తతోసా జలె, బోదన కెరుక. ⁸ ప్రబు దిలి సెక్తిక మాన్సుల్క జాగర్తల్ సంగితో దిట్టుమ్ దయిరిమ్ కెర్తొసా జలె, జాగర్తల్ సంగుక, దయిరిమ్ సంగుక. మాన్సుల్క తోడు దెంక సెక్తి తిలోసా జలె, దర్ముమ్ తెన్ దెవుసు. సంగుమ్క ఏలుప కెర్తి సెక్తి తిలోసా జలె, జోవయించి జా కామ్ నిదానుమ్ దెకన్సు. బాదల్ సేడ కన్కారుమ్ జలనక దెకితి సెక్తి తిలోసా జలె, సర్బబుద్ది తెన్ దెకున్.

సర్బబుద్ది ప్రేమబుద్ది తెన్ తా

⁹ ఎక్కి మెన్సు మాయ నెంతె మాన్సుల్క తుమ్ ప్రేమ దెకితె తా. గర్చి ఎత్కి దూరి కెర, చెంగిల్ తిలిసి దెరన. ¹⁰ బాబేన్క దెకితి సత్తిమ్ తెన్ ఎక్కిలోక ఎక్కిలో ప్రేమ దెకితె తా. దాకు కెరన ఎక్కిలోక ఎక్కిలో వెల్లో మెలి రితి దెక. ¹¹ కెయక బద్దుకుమ్ జా నాయ్, గని దేముడుచి సుద్ది తిలి ఆత్మ, తుమ్చి ఆత్మతె దీవు లగిల్ రిత తా, కెర్టోడ్ కి ప్రబుచి సేవ కెర్తినె తుమ్చి ఆత్మ పూర్తి బెదవ. ¹² పరలోకుమ్తె తుమ్ బెదితి రచ్చన కచితుమ్ నెరవెర్సుప జంక తిలిన్చి దయిరిమ్క సర్బసంతోసుమ్ తా, బాదల్ ఓర్సుప జా, ప్రార్దన కెర్తె తా, ¹³ అన్నె నంపజలనక కొత్తుల్ తిలె, తుమ్క తిలిన్క తోడు దాస, చి అన్నె మాన్సుల్క గెరి బుకారా మరియాద దెక.

14 “జోక చెంగిల్ దెకు” మెన, తుమ్క అల్లర్ కెర్తసచి రిసా ప్రబుక తుమ్ ప్రార్దన కెర. “జోక ప్రబు సిచ్చ కెర్పు” మెన తుమ్ ఉచర నాయ్. జా పొన, గని ‘జోక చెంగిల్ దెకున్’ మెనయ్ తుమ్ కోర్ప జా. 15 అన్నె, సర్ల తెన్ తిలస తెన్ సంతోసుమ్ జా, ఏడ్డన తెన్ ఏడ్డి రితి తోడు తా. 16 ఎక్కిలో తెన్ ఎక్కిలో ఎక్కి మెన్ను తెన్ జియ. *గవురుమ్ జతినక ఆన నే జతె, బడాయ్ నెంజిలిన్తె బెద, కిచ్చొ గవురుమ్ ఉచరన నాయ్. తుమ్క తుమీ బుద్ది తిలస మెన ఉచర నాయ్.

17 కో తుమ్క కిచ్చొ నస్తుమ్ కెర తిలె, జోక తుమ్ కిచ్చొ నస్తుమ్ అన్నె కెర నాయ్. †గని కో తుమ్క నింద కెరుక నెతిరి రితి, ఎత్తిజిన్ చినితి రితి సత్తిమ్ ఇండ. 18 ఎత్తిజిన్ తెన్ సేతుమ్ తెన్ తంక ఆన జా. దస్సి, ఎక్కి మెన్ను తెన్ తతిసి తుమ్ పిట్టవ నాయ్. జేవ్ పిట్టయ్లె, జోవయించి పూచి, గని తూమ్ పిట్టవ నాయ్.

19 ప్రేమ తిల బావుడ్లు, మాన్నుల్ తుమ్క అల్లర్ కెర్లె, జోవయింకయ్ తుమ్ అల్లర్ కెర నాయ్. పొన, దేముడు సిచ్చ కెర్లె, కెర్పు, గని తుమి తుక్కె తా. దేముడుచి కొడతె,

‡“సిచ్చ కెర్తి సెక్తి అంచి. ఏ జేవ్ అల్లర్ కెర్లసక ఆవ్వి
సిచ్చ కెరిందె మెన ప్రబు సంగితయ్”
మెన రెగ్గ అస్సె.

20 §“తుమ్చొ విరోదుమ్ సుదొక చూ తిలె, జోక అన్నిమ్ దాస.

జోక తాన్ తిలె, పితిసి దాస.

తుమ్ దస్సి కెర్లదు మెలె,

జోచి బోడి ఆగి సువ దిలి రితి జయెదె, చి

జో పూర్తి లాజ్ జా తప్పు చినంతిసి జోవయింక నొప్పి దెయెదె.”

* 12:16 12:16 సామెతల్ 3:7. † 12:17 12:17 సామెతల్ 3:4. ‡ 12:19
12:19 ద్విత్వియాపదేశ కాండుము 32:35 § 12:20 12:20 సామెతల్ 25:21, 22.

మెన దేముడుచ కొడొతె రెగ్డ అస్సె. ²¹ అన్నెక్లో తుమ్క కెర్లి గార్ తుమ్క జీన్తి రితి తుమ్ కోపుమ్ జా నాయ్, గని జో కెర్లి గార్ ఓడుప జా ప్రేమయ్ జీన్తి రితి, తుమ్చ విరోదుమ్ సుదల్క తుమ్ ప్రేమయ్ దెక.

13

అదికారుల్క బియఁ కెర ఇండ

¹ దేసిమ్క ఏలుప కెర్త అదికారుల్క ఎత్తి మాన్సు బితు. కిచ్చొక మెలె, దేముడు సెలవ్ దెతో నాయ్ జలె, అదికారుల్ జా తత్త నాయ్, అన్నె, తిల అదికారుల్ ఏలుప కెరుక జో దేముడుచి ఇన్ఱుమ్.

² జాకయ్, అదికారుల్చి కోడుక కో విరోదుమ్ కెర్తతి గే, దేముడు దిలిన్చి ఉప్పిరి విరోదుమ్ కెర్తతి, అన్నె, కో జోచి సెలవ్చి ఉప్పిరి విరోదుమ్ కెర్తతి గే, జోవయింక జొయ్యి జెతి సిచ్చ కవుల.

³ అన్నెయ్ కిచ్చొక అదికారుల్క మరియాద దెకుక మెలె, చెంగిల్ బుద్ది ఇండితసక నాయ్, గని గర్చ కమె కెర్తసకయ్ సిచ్చ కెరుల. అదికారి జలొ కేన్ మాన్సుక 'సిచ్చ కెరెదె' మెలె బయిమ్ నెంతె జింక ఇన్ఱుమ్ జతసు జలె, సత్తిమ్ కెర, చి తుమ్క చెంగిల్ దెకెదె. ⁴ తుమ్క 'చెంగిల్ తత్తు' మెనయ్ దేముడు జోవయింక జా సేవ దా అస్సె. గని తుమ్ నేరిమ్లు కెరె జలె, తుమ్ బియఁ. కిచ్చొక మెలె, సిచ్చ కెరుక జోక అదికారుమ్ అస్సె. 'నేరిమ్ కో కెరుల గే, సిచ్చ కెర్చు' మెనయ్ దేముడు జోవయించి అదికారుమ్ జోవయింక దా అస్సె.

⁵ జాకయ్, సిచ్చ నే సేడ్డి రిసా కి, గని అన్నెయ్ 'దేముడుచి మొక్కె అమ్ అదికారుల్క దస్సి దెకుక మెనయ్, అమ్చి పెట్టి సేంతుమ్ తంక జలె, దస్సి కెరుక అస్సె' మెనయ్ కి, అదికారుల్చి కోడు అమ్ బింక అస్సె. ⁶ ఇన్నెచి రిసా కి సిన్ఱు గట్ట దెతసు. కిచ్చొక మెలె, సిన్ఱు నజేత సుంకర్లు చి అన్నె అదికారుల్ ఏలుప కెర తుమ్క దెకుక మెన, జోవయించి కామ్ దేముడు జోవయింక దా అస్సె. ⁷ జేవ్ ఎత్తిజిన్క దెతిసి జోవయింక దాస. సిన్ఱు నజుక అదికారుమ్ తిలసక సిన్ఱుచి డబ్బుల్ దాస, ప్రబుతుమ్క దెతిసి ప్రబుతుమ్క దాస. గవురుమ్క

విలువ తిలసక గవురుమ్ దెక, చి మరియాదక విలువ తిలసక మరియాద దెక. దస్సి ఎత్కిజిన్క జేవ్చి జేవ్చి మరియాద కెరుక.

ఎక్కిలోక ఎక్కిలో ప్రేమ కెరై తతిసి

⁸ ప్రేమ కెరుకయ్, గని వేర రునుమ్ కత్తెయ్ జా నాయ్. కిచ్చొక మెలె, అన్నె మాన్సుల్క కో ప్రేమ ఇండితయ్ గే, ఆగ్గుల్ ఎత్కితె దొర్కు జలిసి నెరవెర్పువ కెర్తయ్. ⁹*‘లంజెకమొ కెర నాయ్’ మెలిన్ జలెకు, ‘నరు అత్య కెర నాయ్’ మెలిన్ జలెకు, ‘చోర నాయ్’ మెలిన్ జలెకు, ‘అన్నె మాన్సుల్చి ఆస్తిక ఆస జా నాయ్’ మెలిన్ జలెకు, దేముడుచ ఆగ్గుల్ ఎత్కితె తిలిసి కి ఎక్కి ఒడుగుతె బెదితయ్. కేన్ ఒడుగుతె మెలె,

†“తుక తూయి కెద్ది ప్రేమ కెరంతసి గే,

తుచి పాసిచొ మాన్సుక తెద్ది ప్రేమ తుయి కెరుక”

మెన దేముడుచ కొడొతె రెగ్గవ అస్సె. ¹⁰ అమ్చి పెట్టి ప్రేమ తిలె, పాసిచొ మాన్సుక కిచ్చొ అల్లర్ కెరుక నెనుమ్. జాకయ్, ప్రేమతెయి ఆగ్గుల్ ఎత్కి నెరవెర్పువ జతయ్.

ప్రబు అన్నె ఉత్త జెతి వెల్లి దీసి పాసి జెతయ్

¹¹ అన్నె, ప్రబు సంగిలి సమయుమ్ పాసి జా అస్సె మెన జాన్సు. మెలె, అగ్గె నిజ తిలె కి, అప్పె ఉట్ట తెలివి జా తంకయ్ అస్సె. సమయుమ్ జా గెచ్చు అస్సె. అమ్ తొలితొ నంపజలి కంట, అమ్చి రచ్చన పాసి జా అస్సె. ¹² రాత్ పాయితి రితి, ఉజిడ్ జయెదె. జాకయ్ అందర్బుద్దిచ కమొ వెంట గెల కెర, ఉజిడ్ బుద్దిచ అయ్దల్ గలనుమ. ¹³ మెద్దెనెచి ఉజిడ్తె బెదిత కమొతె ఇండుమ. మెలె, ‘నర్ద కెర్తసుమ్’ మెన వెట్కారుమ్ జతిసి, మచ్చితిసి పోన. లంజెకమొ, ఆగ్చెచి ఆస ముద్దొ నే కెరంతిసి పోన. కొడొ జుజవ జట్టి జతిసి, గోసల్ కెర్తిసి, పోన. ¹⁴ గని ప్రబు జలో యేసుక్రీస్తుచి బుద్ది గలన, మాన్సుచి

* **13:9** 13:9 నిర్గమకాండుమ్ 20:13-15, 17. ద్విత్వీయోపదేశ కాండుము 5:17-19, 21. † **13:9** 13:9 లేవీయకాండుమ్ 19:18.

అగ్గచ తుమ్చ ఆసల్ నెరవెర్చువ నే కెరంతి రితి జాగర్త తా, దనచక కిచ్చో వాటు దాస నాయ్.

14

ఇసి కెర్లె గారు దస్సి కెర్లె చెంగిలి

1 నంపజలన కిసి ఇండుక గే ఇదిల్ నేన్లొ కేన్ నంపజలనక బెదవన, గని ముక్కిమ్ నెంజిలిన్చి రిసా జోవయింతెన్ కామ్క నెంజిల కొణొ జుజవుక పోన. 2 ఏక్చి రిసా ఉచరుమ. “కిచ్చో కి కంక జయెదె” మెన, దయిరిమ్ తిలోసా ఉచరెదె, గని “ఈంజ జా గారు” మెంతి అలవాట్ తెంతో పూర్తి విడ్డల్ నే జలోసా కో జలెకు ముక్కల్ గట్ట కయె నాయ్. 3 జలె, తుమ్చితె నే కతోసాక, కతోసా నిస్కారుమ్ దెకున్ నాయ్, చి కతోసాక, నే కతోసా నిస్కారుమ్ దెకున్ నాయ్. కిచ్చొక మెలె, దేముడు ఇన్నెక కి జోవయింక కి బెదవన అస్సె. 4 అన్నెక్లొచొ సేవ కెర్తొన్చి రిసా తుమ్చితె కో తీర్పు కెరుక కొన్న? జోవయింక ‘చెంగిల్’ మెనుక గే ‘గార్’ మెనుక గే కచి సెక్తి మెలె, జోచొ సొంత ఎజొమానిచి సెక్తి, అన్నె కచి నాయ్. జో నిజామి నంపజలోన్ జలె, కో వేర ఉచర్లె కి, జో టీవెదె. కిచ్చొక మెలె, జోక టీవెడుక ప్రబుక సెక్తి అస్సె.

5 పడ్డె, ఏక్ దీసిచి కంట అన్నెక్ దీసిక ‘ఎల్లకాలుమ్చి రిసా ముక్కిమ్చి’ మెన ఎక్కిలో ఉచరెదె, గని అన్నెక్లొ జలె, ఎత్కి దినాల్క ఎక్కి రితి దెకితయ్. ఎత్కి మాన్సు ఈంజేవ్ దొన్నితె కేన్ రగుమ్ ఉచర్తసు గే, సరిగా ఉచర తా. ఎత్కి మెన్సు నిదానుమ్ ఇండ. 6 దీసిక, “ప్రబుచి గవురుమ్ దెకయ్తి రిసా ఈంజ జా కామ్ పలాన దీసి కెర్లె చెంగిల్” మెన కో ఉచర్తయ్ గే, ప్రబుచి గవురుమ్ ఉచర్తయ్. దస్సి, ‘తుయి దిలిసి’ మెన దేముడుక ఉచరయ్ కో ముక్కల్ కతయ్ గే, ప్రబుక గవురుమ్ దెతయ్. దస్సి కి, ముక్కల్ నే కతోసా కో జలె, జో కతిస్క ‘తుయి దిలిసి’ మెన దేముడుక ఉచర్లె, జో కి ప్రబుక గవురుమ్ దెతయ్.

7 అమ్చి రిసా అమ్మి జిము నాయ్, మొరుమ్ నాయ్. 8 అమ్ జలె, ప్రబుచి సేవచి రిసాయి జితసుమ్. అమ్ మొర్లె, జా కి జోచి సేవ.

జాకయ్, అమ్ జిలె కి మొరై కి, జోచయ్ మాన్సుల్ అమ్. జొయ్యి అమ్చొ ఎజొమాని. ⁹ ఇసికయ్ క్రీస్తు మొర్లన్ చి అన్నె జిలన్. మెలె, మొర్సుక జిన కెర, మొర్లసక కి, జితసక కి జో ప్రబు జా, ఎజొమాని జా, ఏలుప కెర్సుకయ్.

¹⁰ తుమ్క బావుడ్లు జల అన్నె నంపజలన్ చి రిసా తుమ్ కిచ్చొక అల్లరచ తీర్పుల్ ఉచర్తసు, నిస్కారుమ్ ఉచర్తసు? లోకుమ్చక జో పరిచ్చ కెర్తి వెల్లి దీసిక అమ్ ఎత్తిజిన్ ప్రబుచి మొక్కె టీవ, జోచి అత్తి తీర్పు జమ్దె. ¹¹ దేముడుచి కొడతె,

“అవ్ కచితుమ్ జివ్వి అస్సి. దస్సి, కచితుమ్, అంచి చట్టె ఎత్తి మాన్సు మొగ్రల్ టెక సెర్ను సేడుల, చి

‘తుయి దేముడు. తీర్పు కెరుక తుచి అత్తి అస్సె’
మెన ఎత్తి చోండి ఒప్పునుల మెన ప్రబు సంగితయ్”

మెన రెగ్డవ అస్సె. ¹² జలె, ఈంజ లోకుమ్తె అమ్ ఇండిలి బుద్దిచి రిసా దేముడు సొంతచి మొక్కె తెదొడక అమ్ ఎత్తి మాన్సు సాచి నజనుక తయెదె.

¹³ జాకయ్, అప్పె తెంతో ఎక్కిలోచి ఉప్పిరి ఎక్కిలో తీర్పుల్ కెరుమ నాయ్, గని కేన్ బావొ ఆత్మక నే పిసిర్తి రితి, కేన్ పొరపాట్ నే జతి రితి, జో ఆత్మక డిట్టుమ్ జతిసి నే పిట్టి రితి, ఎక్కి మెన్సు తెన్ ఇండుక అమ్చి పెట్టి ఒప్పునుమ. ¹⁴ ప్రబుచి తెడి తా కిచ్చొ జాని, కిచ్చొ పూర్తి దయిరిమ్ తెన్ అస్సి మెలె, జేవ్చి సొంత సెక్తికి కిచ్చొ వస్తువచి రిసా

‘గార్’ మెనుక నెంజె. గని జాక ‘గార్’ మెన కో దెకితయ్ గే, జోకయ్ జా గారు జయెదె. ¹⁵ జాకయ్, తుమ్ కేన్ జవున్ రగుమ్ కతిసి అన్నెక్లొచి ఆత్మతె జోవయింక అల్లర్ కెరెదె మెన తుమ్ జాన జానయ్ కయ్లె, తుమ్ ప్రేమయ్ ఇండుక ముల తస్తె. తుమ్ కేన్ జవున్ రగుమ్ కయ్లె ప్రబు మొర రచ్చించుప కెర్లొ అన్నెక్లొచి ఆత్మతె జోక పాడ్ కెరెదె జలె, జా కంక పోన.

¹⁶ జాకయ్, ‘చెంగిల్’ మెన కేన్ అలవాట్చి రిసా తుమ్ జాన్సు జలెకి, వేర మాన్సుల్చి మొక్కె జా కామ్చి రిసా ప్రబుచి నావ్

నిస్కారుమ్ జయెదె జలె, జా నే కయ్లె చెంగిలి. 17 కిచ్చొక మెలె, దేముడుచి రాజిమ్తె బెదితిన్క కతిసి పితిసి ముక్కిమ్ నాయ్, గని దేముడుచి సుద్ది తిలి ఆత్మ దెతి సత్తిమ్ సేంతుమ్ అన్నె సంతోసుమ్, జేవ్ ముక్కిమ్. 18 ఈంజేవ్ వరుమ్ ఇండితి రితి కో క్రిస్తుచి నేవ కెరుల గే, 'చెంగిల్' మెన దేముడు కి మాన్సుల్ కి దెకుల.

19 జాకయ్, ఎక్కి మెన్సు తెన్ తతిన్చి రిసా, ప్రబుచి ఉప్పిర్చి అన్నె మాన్సుల్చి నముకుమ్ డిట్టుమ్ కెర్తెన్చి రిసా కిచ్చొ కిచ్చొ కామ్క జెయెదె గే, జయ్యి ముక్కిమ్ ఉచరై తమ. 20 ఎక్కి కతిసి నే కతిన్చి రిసా మాన్సుచి పెట్టి దేముడు కెర్తి కామ్ తుమ్ పాడ్ కెర నాయ్. నిజుమి ఎత్కిక కి 'కంక జయెదె' మెనుక జయెదె, సుద్ది అస్సె, గని ఆమ్ కతిన్చి రిసా, అన్నెక్కో జోచి ఆత్మతె తప్పు జలి రితి జయెదె జలె, అమ్చి తప్పు. 21 తుమ్ ముక్కల్ కతిసి జవున్, కేన్ రగుమ్ పితిసి జవున్, కిచ్చొ కామ్ కెర్తిసి జవున్, తుమ్చొ బావొ జతో కేన్ నంపజలసచి ఆత్మతె జోవయింక పాడ్ కెరెదె జలె, జా కామ్ తుమ్ ములిలె చెంగిలి.

22 జలె, 'ఇసి దస్సి కెర్లె చెంగిల్' మెన తుమ్చి పెట్టి కిచ్చొ నముకుమ్ అస్సున్ గే, తుమ్చి పెట్టి దేముడుకయ్ ఒప్పున. 'ఆవ్ కయ్లె తప్పు నెంజె' మెన కక్క దయిరిమ్ తయెదె చి 'ఆవ్ కయ్లె కచి ఆత్మతె జోవయింక పాడ్ కెరె నాయ్' మెన జో జాన్లె, జోమాన్సుక చెంగిలి. 23 గని 'కయ్లె తప్పు' మెన కో ఉచరయ్ కయ్లె, ప్రబుచి సిచ్చ ఆనన్తయ్. కిచ్చొక మెలె, జో కయ్లిసి జోచి పెట్టి జో ఉచర్లిస్ తెన్, జోవయించి నముకుమ్ తెన్, బెదె నాయ్. 'పలాన కామ్ కెర్లె చెంగిల్' మెలి దయిరిమ్ అమ్చి పెట్టి నెంజిలె, జా కామ్ అమ్ కెర్లె పాపుమ్ జతసుమ్.

15

దేముడుచి గవురుమ్ దెకవుక

1 అమ్ ఆత్మక డిట్టుమ్ తిలస జలె, డిట్టుమ్ నెంజిలసచి జాడు వయిలి రితి జోవయించ అన్మానల్ ఓర్పుప జా అమ్చి ఇస్తుమ్

గడియ ములిలె చెంగిలి. ² అన్నె మాన్సుల్క 'ఆత్మక డిట్టుమ్ జా చెంగిల్ జతు' మెన, జోవయించి ఇస్టుమ్ తిలిన్క మరియాద్ దెకుమ. ³ కిచ్చొక మెలె, క్రీస్తు ఎక్కి జోచి సొంతయ్ ఇస్టుమ్క కిచ్చొ కెరె నాయ్, గని దేముడుచి కొడొతె రెగిడ్డిసి జొయ్యి సంగిలి

*"దేముడు ఓ బ,

తుక మాన్సుల్ కెర్ల నిందల్ అంకయ్ లయ అస్తి"

మెన జో సంగిల్ రితి అస్సె. ⁴ జలె, పూర్గుమ్ రెగిడ్డిసి కిచ్చొక రెగ్డ అస్సె మెలె, అమ్కయ్ 'సిక్కుత్' మెనయ్ రెగ్డ అస్సె. దస్సి, దేముడుచి కొడొతె రెగ్డయ్లిసి అమ్క నిదానుమ్ దయిరిమ్ సికడ్లె, అమ్ దయిరిమ్ డిట్టుమ్ జమ్దె. ⁵ యేసుయి జో ఇండిలిన్క తుమ్క వాట్ దెకయ్లి రితి తుమ్ ఎక్కిలో తెన్ ఎక్కిలో దస్సి ఎక్కి మెన్సు తెన్ జితి రితి, నిదానుమ్ దెతో దయిరిమ్ దేముడు తుమ్క సెక్తి దెవుసు, ⁶ చి తుమ్ ఎక్కి మెన్సు తెన్ ఎక్కి అవాడ్ రితి జా, అమ్చొ ప్రబు జలో యేసుక్రీస్తుచొ అబ్బొన్ జలో దేముడుచి గవురుమ్ దెకయ్తె తస్సె.

⁷ జాకయ్, క్రీస్తు తుమ్కయ్ బెదవన్లి సర్ల తెన్, దేముడుచి గవురుమ్ దెకయ్తి రిసా తూమ్ కి ఎక్కిలోక ఎక్కిలో బెదవన. ⁸ కిచ్చొక మెలె, తుమ్క ఆవ్ కిచ్చొ మెంతసి మెలె, క్రీస్తు †యూదుల్క సేవ కెర్తొసా రితి జలో. కిచ్చొక మెలె, దేముడుచి సత్తిమ్ దెకవుక. కీసి మెలె, జోవయించ పూర్గుల్క దేముడు దిల ప్రమానల్ నెరవెర్నుప కెర్తి రిసా. ⁹ అన్నె కిచ్చొచి రిసా మెలె, యూదుల్ నెంజిలసక కి జో దెతి రచ్చన జో దొర్కు కెర్లె, జోవయించి దయ కన్యారుమ్చి రిసా జేవ్ కి దేముడుక గవురుమ్ దెతు మెనయ్. దేముడుచి కొడొతె దాచీదు పూర్గుమ్చొ;

‡"జేవ్ కి, యూదుల్ నెంజిలస తెన్ కి సర్ల జా,

గాయ గాయ తుచి నావ్ గవురుమ్ కెరుమ్దే"

* **15:3** 15:3 కిర్తనలు 69:9. † **15:8** 15:8 ఈంజ ఉత్తుమ్ తొలితో రెగిడ్ల కార్గల్తె కిచ్చొ అస్సె మెలె, 'యూదుల్ జతి గుర్తుచి సున్నతి కెరన్లసక సేవ కెర్తొసా...' ‡ **15:9** 15:9 సమూయేలు దొన్నిచి వున్లకుమ్ 22:50, కిర్తనలు 18:49.

మెన రెగ్డ అస్సె. 10 పడ్డో దేముడుచి కొడతె,
 §“జోవయించ సొంత మాన్సుల్ తెన్ తూమ్ కి, యూదుల్ నెంజిలన,
 సర్దసంతోసుమ్ జా”

మెన మోసేచి అత్తి రెగ్డ అస్సె. 11 పడ్డో దావీదుచి అత్తి అన్నె రెగిడ్లిసి,
 *“యూదుల్ నెంజిల ఎత్తి దేసిమ్చ,
 ఒండి లోకుమ్చ మాన్సుల్,
 ప్రబుచి గవురుమ్ గాయ”

మెన రెగ్డ అస్సె. 12 పడ్డో అన్నె, యెసయాచి అత్తి దేముడుచి కొడతె,
 †“యెస్సయిచి సెకుమ్తె ఎక్కిలో జెర్దెదె.

జొయ్యి ఉట్ట, యూదుల్ నెంజిలసక ఏలుప కెరెదె, చి
 జోచి ఉప్పిరి నముకుమ్ తియ, జేవ్ యూదుల్ నెంజిలన
 రచ్చనచి దయిరిమ్ తెన్ తవుల”

మెన రెగిడ్లి కోడు.

13 జలె, రచ్చన జతి దయిరిమ్ దెతో దేముడు సొంత తుమ్చి
 పెట్టి జోచి నముకుమ్చి సర్ద సేంతుమ్ దెవుసు, చి దేముడుచి సుద్ది
 తిలి ఆత్తుచి సెక్తి తుమ్చి ఆత్తుతె తా, తుమ్చి ఆత్తు పూర్తి డిట్టుమ్
 దయిరిమ్ జా గెచ్చెదె.

యూదుల్ నెంజిలసతె పవులు ప్రబుచి కామ్ కెర్లిసి

14 ఆవ్, బావుడ్లు, తుమ్చి రిసా కిచ్చొ దయిరిమ్ తెన్ అస్సి మెలె,
 తుమ్చి పెట్టి ప్రబుచి సత్తిమ్ అస్సె. జో దెతి గ్యానుమ్ అస్సె, చి
 ఎక్కిలోక ఎక్కిలో బుద్ది సంగుక తుమ్క సెక్తి అస్సె. జా ఎత్తిచి రిసా
 అంక దయిరిమ్. 15 గని, సగుమ్ కమెచి రిసా తుమ్క ఇదిల్ గట్టిజ
 సంగిల్ రితి రెగ్డ అస్సి, తుమ్క పచ్చుత్ నాయ్ మెన. దేముడు అంక
 దిలి అదికారుమ్ వరుమ్చి రిసా ఆవ్ జా రెగుడుక జయెదె. 16 జో
 దిలి అదికారుమ్ వరుమ్ మెలె, యెసుక్రిస్తుచి రిసాచి జోచి సుబుమ్
 కబుర్ సూనవ సూనవ, జో దేముడుచి సేవ కెర్తొ పూజరి మెలి రితో

§ 15:10 15:10 ద్వితియోపదేశ కాండుము 32:43. * 15:11 15:11 కీర్తనలు
 117:1. † 15:12 15:12 యెసయా 11:10.

ఆవ్ జంక మెన జో నిసాన కామ్ తియార్లి వరుమ్. మెలె, యూదుల్ నెంజిలనక క్రీస్తుక నంపజా దేముడుచి సుద్ది తిలి ఆత్మచి సెక్తిక జేవ్ జోచయ్ జా, సుద్ది జా దేముడుక సరి జలి బలి జతి రితి, జోచి అత్తి ఆవ్ సొర్పు కెర దెంక.

17 జలె, దేముడుచి సేవ ఆవ్ కెర్లిన్చి రిసా 'చెంగిల్చి' మెన క్రీస్తు జలొ యేసుచి తెడి అంక దయిరిమ్. 18 మెలె, యూదుల్ నెంజిలన జోవయించి ఉప్పిర్చి నముకుమ్ ఇండితి రితి క్రీస్తుయి అంచి అత్తి జర్గు కెర్లిన్చి రిసాయి ఆవ్ సంగితసి. జో ప్రబు కీసి ఈంజ కామ్ అంచి అత్తి జర్గు కెర్లన్ మెలె, ఆవ్ బోదన కెర్లిన్తె, ఆవ్ ఇండిలి బుద్దితె, 19 జో అంచి అత్తి కెర్ల జోచి గుర్తుచ వెల్లో కమొతె, జో దిలి దేముడుచి సుద్ది తిలి ఆత్మచి సెక్తికయ్ జర్గు కెర్లన్. దస్సి, జోచి సెక్తికయ్, యెరూసలేమ్ పట్టుమ్ తెంతో తుమ్క సముద్రుమ్ ఒత్తల్తోచి ఇల్లారికు ప్రదేసిమ్చి ఎదిలి దూరిక క్రీస్తుచి సుబుమ్ కబుర్ జా ఎత్తితె ఆవ్ నూనవ అస్సి. 20 దస్సి, అంచి ఆన కిచ్చొ మెలె, వేర మాన్సు పునాది కెర్లి ఉప్పిరి బందుక నెన, క్రీస్తుక మాన్సుల్ నంపజా తిలిన్తె నాయ్, గని వేరతెయ్, మాన్సుల్ జోక నేన్లిన్తెయ్ సుబుమ్ కబుర్ నూనవుక అంచి ఆన. 21 దేముడుచి కొణెతె;
‡“జోచి రిసా కో అగె నే నూనయ్లన నూన,
జేవ్ గుడ్డి మెలి రితి జలిసి గెచ్చ, దెకుల.
జోచి రిసా కెయ్క నే నూన్లన అర్దుమ్ కెరనుల”
మెన రెగ్గయ్లి కోడు.

రోమ్ పట్టుమ్చ గెచ్చుక మెన పవులు ఉచర్లిసి

22 జలె, సుబుమ్ కబుర్ నే నూన్ల టాన్లుతె గెచ్చ నూనవుక అంచి కామ్ తిలి రిసా, అప్పొక తుమ్తె జెంక అంక వాటు తయె నాయ్. 23 గని అప్పొ, ఈంజేవ్ ప్రాంతుమ్లుతె అంక అన్నె కామ్ నాయ్ మెన, ఒగ్గర్ వెర్సుల్ తెంతో తుమ్తె జెంక అంచి ఆసచి రిసా, 24 స్పెయిను

‡ 15:21 15:21 యెసయా 52:15.

దేసిమి ఆవ్ గెతి పొదిక, వట్టె తుమ్తె గోత్ జా తుమ్క దెకుక ఉచర్తసి. సర్ల తెన్ గడియ తుమ్చి తెన్ తా పుండిలయ్ మెలె, తుమి అంక బార్ కెర వట్టె తెద్రయ్తె.

25 గని అప్పె యెరూసలేమ్తె ఉట్ట గెతసి; ఒత్తచ నంపజలన్క తోడు న దెంక. 26 మాసిదోనియచ చి అకయచ నంపజలన్క యెరూసలేమ్చ యూదుల్చ బీద జల నంపజలన్క తోడు ఉక్కుల తెద్రవుక ఇస్టుమ్ జల. 27 ఈంజేవ్ ఇస్టుమ్ జల, గని అన్నె జేవ్ యెరూసలేమ్చ నంపజలన్తె రునుమ్ జలి రితి జా అస్తి. మెలె, యూదుల్కయ్ దేముడు దిల ఆత్మవరల్తె ఈంజేవ్ యూదుల్ నెంజిలనక వాట అయ్లి రిసా రునుమ్ జలి రితి జా అస్తి, చి జేవ్ యూదుల్క కిచ్చొ జవున్ ఈంజ లోకుమ్తె కామ్క జెతికయ్ తోడు ఈంజేవ్ యూదుల్ నెంజిలన దిలె, చెంగిలి.

28 జాకయ్, ఈంజేవ్ ఉక్కిలి తోడు నా దెతి కామ్ కుట్టయ్లయ్ మెలె, స్పెయిన్తె గెతి వట్టె తుమ్తె జెయిందె, 29 చి తుమ్తె పాచ అయ్లె, క్రీస్తు దెతి ఆత్మసిక్తి అంచి పెట్టి బెర తా జా సెక్తి తెన్ని జెయిందె మెన జాని.

రోమియల్ పవులుచి రిసా ప్రార్దన కెరుక

30 బావుడ్లు, 'అమ్చొ ప్రబు జలొ యేసుక్రీస్తుచి నావ్ తెన్ చి దేముడుచి సుద్ది తిలి ఆత్మచి ప్రేమక, అంచి రిసా దేముడుక తుమ్ ప్రార్దన కెర కెర అంక తోడు తా' మెన తుమ్క ఆవ్ బతిమాల్పా జా సంగితసి. 31 కిచ్చొచి రిసా మెలె, ఆవ్ అప్పె గెతి యూదయ ప్రదేసిమ్చ యేసుచి రిసా అన్మానుమ్ తిలనతె ఆవ్ దెర్ను నే సేడ్డి రిసా, వడ్డొ ఒత్తచి యెరూసలేమ్ పట్టుమ్చ నంపజలనచి రిసాచి అంచి సేవ జోవయింక చెంగిల్ సేడ్పు మెనయ్ తుమ్ ప్రార్దన కెర. 32 దస్సి జెయిమ్ జలి మెలె, సర్దనంతోనుమ్ తెన్ ఆవ్ తుమ్తె జెంక జయెదె, చి తుమ్చి తెన్ తా సర్ల తెన్ పుండుక జయెదె. 33 సేంతుమ్ దెతో దేముడు సొంత తుమ్చి తెన్ తవున్! ఆమేన్.

16

సర్ల తెన్ సంగుమ్తె బెదవనుక

1 క్రీస్తుచి తెడి అమ్క అప్ప జలి పీబే, కెంక్రేయ పట్టుమ్చి సంగుమ్తె వెల్లో తేర్బోద జా ప్రబుచి సేవ కెర్తయ్. జాక 'సత్తిమ్చి' మెన ఆవ్ సాచి జతసి. 2 తుమ్తె జా అయ్లె, ప్రబుచయ్ జల మాన్సుల్క దెకితి మరియాద తెన్ జాక బెదవన, చి కిచ్చొ కామ్తె జేవ్ కి తోడు కావలె మెలె, తోడు తా. కిచ్చొక మెలె, అగ్గె తెంతో ఒగ్గర్జిన్ నంపజలసక జా తోడు కెర అస్సె, అంక కి.

3 యేసుక్రీస్తుచి కామ్ అంచి తెన్ బెద కెర్లె ప్రిస్కిల్లక చి అకులక అంచి ప్రేమ సంగ. 4 అంక 'మొర్ను నాయ్' మెన జా సుట్టు జెవ్వి ప్రమాదుమ్ జల. ఎక్కి ఆవ్ మెన నాయ్, గని యూదుల్ నెంజిల బావుట్లచ సంగుమ్లు ఎత్తి జేవ్ దొగులచి కామ్చి రిసా అంచి తెన్ జోవయించి సర్ల కి సంగితసుమ్. 5 జోచి గెరి సబ కెర్తి సంగుమ్చ ఎత్తిజిన్క అంచి ప్రేమ సంగ. ప్రేమ తిలో ఎపైనెటుక అంచి ప్రేమ సంగ. ఒండి ఆనియా ప్రదేసిమ్తె జొయ్యి తొలితొ ప్రబుక నంపజా మార్పుప జలో. 6 తుమ్చితె నిదానుమ్ కామ్ కెర్లి మరియక కి సంగ, 7 పడ్డొ అంచ బందుగుల్ జత అంద్రోనిక చి యూనియక కి. అంచి తెన్ జేవ్ జేలి జా తిల. ప్రబుచి సుబుమ్ కబుర్ సంగిత బారికుల్తె జోవయింక గవురుమ్ దెకితతి, చి అంచి కంట అగ్గెయి క్రీస్తుచ మాన్సుల్ జల.

8 పడ్డొ, ప్రబుచి తెడి ఆవ్ ప్రేమ తిలో అంప్లియతునక అంచి ప్రేమ సంగ. 9 పడ్డొ క్రీస్తుచి కామ్తె అమ్చి తెన్ బెదిలో ఊర్బానుక, చి ప్రేమ తిలో స్థాకునక అంచి ప్రేమ సంగ.

10 క్రీస్తుక సత్తిమ్ తిలో అపెల్లెక చి అరిస్థాబూలుచి కుటుంబుమ్చ ఎత్తిజిన్క సంగ. 11 అన్సె, అంక బందుగుడు జతో హెరోదియోనుక చి నార్కిస్సు చి కుటుంబుమ్తె ప్రబుక నంపజలసక సంగ. 12 పడ్డొ, ప్రబుచి కామ్ కెర్లె త్రుపైనా చి త్రుపోసా మెల తేర్బోదల్క జోబర సంగ. పడ్డొ ప్రబుచి కామ్ నిదానుమ్ కెర్లొ ప్రేమ తిలో పెర్సిసుక జోబర

సంగ. 13 పడ్డొ ప్రబుచి తెడి ఒగ్గర్ బుద్ది సుదొ జలొ రూపుక చి అంక అయ్య మెలి రితి జలి జోచి అయ్యన్క అంచి ముద్దుచి జోబర సంగ. 14 పడ్డొ అసుంక్రితుక, ప్లెగోసుక, హెర్మేకుక, పత్రోబక, హెర్మాకుక చి జోవయింతెన్ తిల బావుడ్లు ఎత్కిక అంచి ప్రేమ జోబర సంగ. 15 పడ్డొ పిలోలోగుక, యూలియాక, నేరియక, జోవయించి బేనిక, ఒలుంపాకుక, చి జోవయింతెన్ తిల బావుడ్లు ఎత్కిజిన్క అంచి ప్రేమ సంగ.

16 ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ ఎక్కిలోక ఎక్కిలో సుద్ది తిలి ముద్దు తెన్ జోకర. ప్రబుచ సంగుమ్లు ఎత్కి తుమ్క జోవయించి ప్రేమ సంగ తెద్రయ్తతి.

17 జలె, బావుడ్లు, తుమ్క కిచ్చొ బతిమాల్పా జా సంగితసి మెలె, తుమ్క సికడ్లి బోదన నాయ్, గని వేరచి సికడ జట్లు కెర్త అన్యానల్ కెర్తస కొన్నగె చిన కెర, జోవయింక తుమ్ సూస నాయ్. దూరి కెర.

18 దస మాన్సుల్ అమ్చొ ప్రబు జలొ క్రిస్తుక నాయ్, గని జోవయించ సొంత ఆసల్కయ్ సేవ కెర్తతి, అన్నె, తేలిక లట్టబ మాన్సుల్క పులవ, ఒగ్గర్ తెలివి నెంజిల మాన్సుల్క మోసిమ్ కెర్తతి. 19 ప్రబుచి కోడు తుమ్ సొంత నిదానుమ్ కెర్తిసి ఎత్కిజిన్ జాన్తి, చి తుమ్చి రిసొ అంక సర్ద, గని తుమ్క 'చెంగిల్చితె తెలివి తత్తు, గని గర్చి నేన్తు' మెనయ్, తుమ్చి రిసొ అంక ఆస. 20 దస్సి జలదు మెలె, తుమ్చ చట్టొ నయ్తాన్క సుద బీడవ జిన్తి రితి, సేంతుమ్ దెతో దేముడు జినఎదె. అమ్చొ ప్రబు జలొ యేసుక్రిస్తుచి దయ తుమ్చి తెన్ తవున్!

21 అంచి తెన్ ప్రబుచి కామ్ కెర్తొ తిమోతి తుమ్క జోచి ప్రేమ సంగ తెద్రయ్తయ్. దస్సి కి లూకియ, యాసోసు చి సోసిపత్తు, అంచ బండుగులు.

22 పవులు సంగితి ఈంజ ఉత్తమ్ రెగిడ్డొ తెర్తియు మెలొ ఆవ్ ప్రబుచి తెడి అంచి ప్రేమ సంగ తెద్రయ్తసి.

23 ఆవ్ ఈంజ ఉత్తమ్ సంగ రెగ్డయ్తో పవులుక టాన్ దిలొ, ఒండి సంగుమ్క టాన్ దెతో గాయియు తుమ్క జోవయించి ప్రేమ సంగ తెద్రయ్తయ్. దస్సి కి ఈంజ పట్టుమ్చ కమొచి డబ్బుల్ దెకితో

ఎరస్తును, చి అమ్చో బావో జలో క్వర్తును జోవయించి ప్రేమ సంగ తెద్రయతయ్.

24 *అమ్చో ప్రబు జలో యేసుక్రీస్తుచి దయ తుమ్ ఎత్కిజిన్ తెన్ తవున్! ఆమేన్.

25 జలె, 'నూనవు' మెన అంక దిలి సుబుమ్ కబుర్ వాటు యేసుక్రీస్తుచి రిసా బోదన కెర్తి వాటు తుమ్క డిట్టుమ్ కెర్తో దేముడుక జోబర! జా సుబుమ్ కబుర్తె బెదితి గుట్టు జో అప్పె బార్ కెర అస్సె. మదెనె, అగ్గె తెంతో లుంకడ తిలో. 26 జలె, యూదుల్ నెంజిలనక కి జోవయించి రచ్చన దొర్కు జలి రిసాచి, ఈంజ గుట్టు జో అప్పె బార్ కెర అస్సె, చి జోవయించ కబుర్లు పూర్గుమ్ సంగిలస రెగిడ్లిసి నూనయ్ జతిన్తె ఒండి లోకుమ్తె ఎత్కి దేసిమ్చక జాన్సున్ మెన కెయక తెయక తా గెతో దేముడుచి ఆడ్ర, ఒండి లోకుమ్తె మాన్సుల్ నంపజా జోచి కోడ్ రితి ఇండుత్ మెనయ్. 27 జలె, యేసుక్రీస్తుచి అత్తి జర్గు జలి కామ్చి రిసా ఎత్కి గ్యానుమ్ తిలో ఎక్కిలో దేముడుక కెయక తెయక జోబర!

* **16:24** 16:24 ఈంజ ఉత్తుమ్ రెగిడ్ల తొలితొచ పుస్తకుమ్ సగుమ్తె 24నంబర్చి కోడు తయె నాయ్.

Kupia New Testament

Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 21 Feb 2024 from source files
dated 29 Jan 2022

7ccb2690-4432-5e86-88c1-f8ee976f30f4